

明三十家詩選 五

忠

袁	張	楊	張	貝
凱	羽	基	以	瓊
三十三首	二十七首	九十四首	六十一首	五十二首

徐賁 十四首


柳田文庫
 文庫11
 D 173
 5





文庫 11
D 173
5

一
 家
 即
 三
 十
 集
 詩
 解



010190557788

同治癸酉十月
蘊蘭吟館重刊

明三十家詩選二集目錄

卷一上

貝瓊 五十二首

附錄

劉永之 十四首

甘瑾 二十首

卷一下

張以寧 六十一首

附錄

劉崧 二十六首

郭奎 十一首

劉炳 十一首

卷二上

國初詩傑
高啓、楊基、袁凱、
張羽

楊基 九十四首

附錄

張羽 二十七首 徐賁 十四首

胡奎 七首 王蒙 七首

卷二下

袁凱 三十三首

附錄

管訥 十四首

卷三上

孫蕢 四十首

附錄

李德 九首 黃哲 四首

邱濬 十一首

卷三下

林鴻 五十四首

附錄

高棅 五首 王恭 十七首

王偁 九首 藍仁 十二首

藍智 二十九首 浦源 八首

卷四上

李昱 三十四首

附錄

凌雲翰 六首 李延興 八首

卷四下

程本立 三十六首

附錄

郭登 九首 劉績 七首

卷五上

邊貢 六十九首

附錄

顧璘 九首 王廷相 七首

公鼐 九首

卷五下

皇甫汸 四十四首

附錄

皇甫湜 十八首 吳鼎芳 三十二首

范汭 十五首

卷六上

高叔嗣 四十首

附錄

薛蕙 七首 華察 十四首

施漸 六首 歸子慕 十二首

李流芳 二十首 錢澄之 九首

張綱孫 四首

卷六下

區大相 四十一首

附錄

鄭明選 六首

卷七上

徐燧 四十六首

徐勣 三十七首

附錄

謝肇淛 十五首

林章 十四首

謝三秀 十七首

居節 九首

卷七下

曹學佺 三十五首

附錄

程嘉燧 二十四首

王翊 二十七首

卷八上

鄺露 三十八首

附錄

黎遂球 九首

羅賓王 七首

卷八下

夏完淳 四十六首

附錄

魏學洵 七首

劉孔和 六首

吳騏 二十三首

明詩選二集止此計八卷 共正選十七家附錄四十八人

卷八上
詩選 二十四首
王 賦 二十一首
謝 詩 十首

明三十家詩選二集卷一上

員 瓊 五十二首

錢塘 汪 端 允莊輯

瓊字廷琚一名闕字廷臣崇德人性坦率篤志好學張士誠屢辟不就洪武初聘修元史既成受賜歸六年以儒士舉除國子助教與張美和聶鉉齊名時稱成均三助廷琚嘗慨古樂不作為大韶賦以見志宋濂為司業建議立四學並祀舜禹湯文為先聖太祖既細其說廷琚復為釋奠解駁之識者多是廷琚議九年改官中都國子監教勳臣子弟十一年致仕卒所著有清江詩集十卷文集三十一卷

朱錫鬯曰廷琚從學於楊廉夫其言曰立言不在巖絕刻峭而平衍爲可觀不在荒唐險怪而豐腴爲可樂蓋學於楊而不阿所好者也其詩爽豁類汪朝宗雄整似劉伯溫風華亞高季廸清空近袁景文明麗若孫仲衍圓秀勝林子羽朗淨過張來儀足以領袖一時此非鄉曲之私天下之公言也又曰元姚文公遂爲承旨時嘗宴集玉堂聲妓畢奏有真真者操閩音詢之乃真西山苗裔也父司筦庫負縣官錢鬻之以償遂流于娼家公愍之白于執政落其籍以妻翰林屬官王棣貲裝皆出于公棣後官至翰林待制廷琚作真真曲紀其事盛傳於時

汪端論曰清江五古溫雅七古清新五律沉警者宗法工部七律工麗者方駕道園在明初諸家中品居文成青邱之下餘子之上而談藝家罕道及之余選明詩二集以清江爲冠亦闡幽之意也○清江以真真曲得名然其詩繁縟殊欠剪裁故不錄孫仲衍驪山老妓行亦然○王鳳洲藝苑卮言搜羅宏富而持論黨同伐異頗傷偏駁尊何李如泰山北斗於明初諸人翦抑太過實爲乖謬蓋元明之交風氣澁樸諸文士皆篤學好修敦厚恬澹以干名爲耻當元季亂離類多屏處林泉觴詠自適雖亦有四傑十子五先生諸稱大抵皆他人品題未嘗動以壇坫主盟自命

明三才詩選卷之七
朝而標榜夕而排擊如正嘉間之惡習也及明祖開
基忌才特甚始則搜剔巖穴務無遺材後乃文字禍
興誅夷相踵其僅免者焚硯晦跡惟恐人知奚暇計
身後名哉然開國之初文運蔚盛且無門戶之見故
諸作者得自抒懷抱各擅所長莫不功力深純風格
雋朗雖不以詩名者單章片語亦復琅琅可誦惜其
遺集多湮晦不彰後之操月旦者若空同滄溟剛愎
自用目光如豆無足深責獨鳳洲名位兼重才識極
高於書無所不覽正宜表揚前哲闡發幽光而乃嫉
其才藻之清新欺其聲華之銷歇於文成青邱尙多
不滿餘子可知其評語不曰沿習元季餘風則曰格

姑左次不論不知元季詩如雲林沖澹海巢悲壯玉
筍竒峭梧溪沉鬱皆獨秀不羣較描頭畫角者奚啻
徑庭而况明初諸人耶且鳳洲所謂格者不過拾曹
劉之唾舖李杜之糟如伶人著面具五色炫爛疑鬼
疑神以震駭天下殊不知毛嫱西施天然國色自有
真面目也嗚呼諸人生邁法網之羅織死受藝苑之
譏彈文人不幸至此極矣雖鳳洲晚歲悔心漸萌自
謂少年盛氣之論不足爲憑然亦未暇改正王漁洋
沈歸愚諸公復循聲附和導流揚波孰謂非鳳洲之
作備哉余選清江以下諸家詩因詳論之古人可作
來者難誣亦以爲後之意氣罩人媚顯凌幽者戒也

雜詩

薛公未罷相。賓客競相傾。一朝偶失意。門無珠履聲。貴賤已如此。何論死與生。秋燕辭空室。春蝶抱留英。盈虛信物理。聚散亦人情。達士甘寂寞。力畊謝華纓。道尊豈戀祿。心遠孰希名。腐鼠非吾餌。朱鳳以時鳴。悠然動遐想。五鼎益爲輕。

郊居

直木惡爲輪。疲馬思卷旆。匡時旣非才。處約斯寡悔。采詩鑒興亡。讀易明進退。永懷嵇阮放。甘與沮溺對。

春日宴滄洲并序

歲在著雍涖灘春三月一日筠谷高士合賓客序

兄弟飲於滄洲一曲平池湧翠高閣延青圓景中天繁陰四合微飈遠激幽芳襲人清醪在壺嘉肴旣旅懲蟋蟀之刺儉美伐木之求友終宴忘疲遷坐復酌鳴葭間發協朱鳳之相和舞袖雙迴翩驚鴻之欲舉嗚呼蘭亭金谷會豈能常滄海流沙兵猶未息懟神仙之無驗宜曠達以爲高用綴新篇以紀雅集

天濶無留雲。山明洗新黛。過從屬休暇。置酒滄洲會。柔荑綠堪藉。雜英紅尙在。累觴旣不辭。秉燭還相對。清彈促哀響。祕舞呈修態。蘭亭今已矣。金谷徒增慨。大化會有終。四時寧復貸。厭厭夜無歸。從人譏倒載。

早春
山寒花尚遲。雪霽江已綠。懷新感游子。晷節喧衆族。且同尊俎歡。幸免章綬束。更擬登前峰。青郊可遊目。

擬東野

破屋夜通月。霜氣刀稜稜。病骨不受寒。卒歲仍無繒。殘燈吐復翳。僵臥如凍蠅。事業慚蒸沙。文章空鏤冰。已失國士意。頗爲少年陵。長歌獨懷慨。坐候東方升。

四月十日兒子翩翩來鳳陽留一月遣歸因令早營草堂及山下爲止息之所云

老病不得歸。獨處常戚戚。二子江南來。眼暗初未識。生常戒垂堂。肌肉如雪白。一月長途間。海風吹盡黑。買酒爲相勞。問答向中夕。迢迢漢陽簿。春來斷消息。阿宣在母傍。頗知工翰墨。艱難且撥棄。頓使沈憂釋。所愧無定居。百歲半爲客。經營須及早。尚愛龍湫僻。況近讀書臺。雲銷四山碧。泉深出丹砂。地冷多琥珀。旣非匡世資。庶遂陶阮逸。良辰戒僮僕。匆匆又南北。五月方鬱蒸。日氣成霞赤。出入非所宜。川陸慎所歷。惜別豈無淚。向汝難再滴。秋江有鱸魚。當挂吳淞席。

答客

竊祿非本性。適彼南山阿。藜藿日不充。慷慨獨商歌。有客向我言。與世同其波。商君震七國。季子傾三河。區區守章句。白首成蹉跎。念之爲三歎。所樂良已多。潛魚駭釣餌。飛

鳥愁網羅結駟非不榮。違己當如何。

夢遊秦望山歌送客歸越中

秦望何崔嵬。削如青蓮開。下臨七十二湖之浩蕩。上接三十六洞之縈迴。夢中夜度浙江水。輕如鶴背乘風來。欲求軒轅上天處。白雲尚鎖燒丹臺。徒知有弱水。安可覩蓬萊。但聞松聲萬壑兮。夾飛湍之喧。厖。赤日慘淡而無色。復殷殷之雄雷。踰千盤兮。歷百折。香爐玉筍左右列。山中二女。問何遲。桃花落盡。燕支雪。金雞三叫。失所在。惟想參差白銀之觀闕。龍綃寄別淚。三載猶未滅。有美一人兮。佩珊瑚。昨遊吳門復東還。余願從而上下兮。叫安期於雲間。回首隔千里。可望不可攀。凌虛縹緲。筆有仙氣。

次韻鐵崖先生醉歌

先生愛酒稱酒仙。清者爲聖濁爲賢。清江三月百花合。江頭日坐流萍船。左攜張好右李娟。紫檀雙鳳鷓鴣絃。傾家買酒且爲樂。老婦勿憂無酒錢。白日西沒天東旋。秋霜入鏡何當玄。蓬萊有路不可到。祖龍已腐三重泉。何如快飲三萬日。酒樓卽起糟邱邊。願持北斗挹東海。月落枕股樓頭眠。

團扇詞

團扇何皎潔。誤方雪與月。雪當有時汚。月亦有時缺。妾恨似天長。君恩成雨絕。昨夜秋風長。信來星河已見西南回。妾有新詞詎堪寫。夜撲流螢玉階下。溫雅得風人之旨。

穆陵行 并序

至元中西僧楊璉真伽利宋諸陵寶玉因倡妖言
惑主盡發殯宮之在會稽者斷理宗頂骨爲飲
器璉敗歸內府九十年矣洪武二年正月詔宣
國公求之得於僧汝訥所乃命葬金陵聚寶山
立石以表之余感而賦詩

六陵草沒迷東西冬青花落陵上泥黑龍斷首作飲器風
雨空山魂夜啼當時直恐金棺腐鑿石通泉下深固一聲
白雁渡江來寶氣竟逐妖僧去金屋猶思宮女侍玉衣無
復祠官護可憐持比月氏王寧飼烏鳶與狐兔真人歛見
起江東鐵馬九月踰崆峒百年枯骨卻南返雨花臺下開

幽宮流螢夜飛石虎殿江頭白堊今不見人間萬事安可
知杜宇聲中淚如霰

己酉清明

白紵衣鮮紫騮馬清明酌酒梨花下馬蹄一去不復來梨
花又見清明開城南城北多新墓日落啼鴉滿高樹有酒
誰澆千歲魂子孫盡發濠州住主人更勸金叵羅阿蠻起
舞玲瓏歌生前不飲君如何

余避地千金圩屢遊及史兩山酒酣興發賦詩一首
惜山中無賞音者空桑亦同於瓦器耳姑錄以自
娛云

神人夜割蓬萊股蒼然尙作青獅舞及基得道此飛騰煙

火千家自成塢。前年盜起官軍下。存者如星纔四五。我來
欲置讀書床。出入未愁穿猛虎。山寒月黑無人聲。夾道長
松作風雨。佩環何日歸公主。泉下銅棺閱千古。石仆麒麟
罷官守。林宿鴟鴞聞鬼語。苦耽勝概惜殘年。共說當時悲
老父。錦繡池臺已零落。田翁八十鋤新土。傷哉土俗尊巫
覡。伏臘荒祠沸簫鼓。祠旁鑿井深不枯。雲氣隨龍有時吐。
試上崔嵬望沃洲。直將培塿齊天姥。春前野桃渾欲放。雪
盡黃精亦堪煮。興來起挾李長庚。重載琵琶雙玉女。

郭忠恕出峽圖

巫峽何危哉。夾拱如龍門。禹治九州不到此。峽口水作雷
霆奔。問汝江中人。幾日三巴去。峩嶶五月銷古雪。灑灑瀕堆

深虎須怒。巫峽之險安可攀。胡爲吳檣楚柁。日日來往於
其間。高堂中有如花顏。銀屏翠箔青春閑。涉此萬里道。經
年猶未還。黃金不買死。直欲高南山。汝舟非龍汝非虎。鼉
鼉出沒饒蛟舞。前者已脫後者號。江神無情天又雨。石巉
巖兮利刃攢。一葉宛轉行千盤。觀此魂魄悸。豈待杜鵑夜
叫猿。聲酸安得鑿之盡。平土萬古不識風波苦。音節古健

送進士霖歸天台

赤城雲氣神仙家。千樹萬樹蟠桃花。十二樓臺起花外。石
門水長通胡麻。當時劉郎亦草草。出山卻憶山中好。莫信
丹邱日月長。玉人已共桃花老。山空水流雲自飛。劉郎看
花須早歸。

題董源寒林重汀圖

天下畫師無董源。學者紛紛工水石。雲山萬里出巴陵。白首淮南見真蹟。亂石平坡淨無土。松根裂石蟠龍虎。偃蓋千年飽雪霜。深林六月藏風雨。江上村虛何處入。浮空遠黛蛾眉溼。漁人日暮各已歸。小舟如鳧落潮急。我昔西清嘗看畫。南唐此本千金價。坐移絕境在雲間。月出霜猿啼後夜。薄遊未挂吳淞帆。令我一夕思江南。安得買田築室幽絕境。開窗日日分晴嵐。澄懷居士曰：神似少陵。

雁聲樓辭

并序

會稽馬本道之金陵也。題其所寓之樓曰雁聲樓。求余賦之。夫雁秋而南。春而北。亦若客焉。明月之

夜霜氣橫空。四野寂寥。劃聞其聲。固足以感人者。況在江湖數千里外。進無所資。退無所適。又當何如耶。然必處於厄者。能聞之。彼富貴之家。二八列侍。歌吹間作。鸞鶴嘯而鶯燕啼。惡知愴然於雁來之頃也。余因爲之辭。未能寫其清亮哀怨之意。姑以洩其旅憤云。

二月寒門雁北飛。八月寒門雁南渡。小樓聞雁卻思鄉。爲客年年在中路。雁啼何噫噫。野濶聲更哀。秋風起。閭闔吹過洞庭來。洞庭月出三湘雪。猶訴當時古離別。湘靈抱瑟爲寫之。二十五絃彈欲絕。樓頭中夜起。彷徨芙蓉葉紅新。著霜天邊有弟消息斷。雁去雁來知幾行。五侯置酒花滿

明三才詩選卷一
堂。羸女。玉笙吹。鳳皇不是關山萬里客。那識此聲能斷腸。
澄懷居士曰。淒清嘹唳。紙上如聞雁聲。

臨平道中

落日臨平路。連山盡向南。水聲黃鶴寺。雲氣白龍潭。喪亂今誰在。幽期昔屢探。湖邊樓閣廢。高柳與天參。
清江五律起調最工

魏塘夜泊

風帆如健馬。一日過嘉興。水鳥時相喚。秋蚊尚可憎。照人明月近。接地白河澄。耿耿渾無寐。中宵對玉繩。

龍泓洞

遠通羅刹國。近接梵王臺。海客然犀入。山人采乳回。林間無日月。地底有風雷。聞道蜿蜒去。寒潮自往來。

理公巖

山僧住上方。高處更蒼蒼。不雨雲煙濕。長春草木香。削成看小朵。幽絕擬空桑。謾識跣趺處。白猿今已亡。

呼猿洞

白猿呼不至。洞口白雲重。澗落經霜果。崖留挂月松。相傳來萬里。獨嘯應千峰。碧玉環猶在。何人識舊蹤。
三詩奇峭似賈長江

晚眺

極目三邊靜。傷心萬室空。斷山明落日。飛藿卷回風。漢節無歸使。夸歌有野童。煙塵幾時息。歸釣古城東。

題盛子昭畫

石轉交流水。山浮欲動雲。名園鄴谷迥。絕境朝川分。老樹

龍初化。仙人鶴不羣。已臨吳道子。不數李將軍。

秋涇雨後

地蟠吳會盡。天與海門通。雨洗秦山碧。霜侵越樹紅。居人分絕島。飛鳥度寒空。極目情何限。緜如入剡中。

二月十三日初度

知非吾已晚。白首尚他鄉。不入廣文館。寧要太守章。寬憂應有物。卻老信無方。謾憶兒童歲。斑衣父母傍。

夜坐

大野喧豺虎。深林集羽毛。天空雲氣盡。夜久月輪高。士卒悲秦戍。兒童唱董逃。此時空感慨。漂泊嘆吾曹。蒼渾一氣。逼似少陵。

亭林漫興

繞屋盡流水。通人無石橋。地偏冬不雪。江濶夜還潮。但喜逢迎簡。寧辭跋涉遙。叢篁與古木。風葉更蕭蕭。

懷語溪舊業

不到溪南宅。桃花又一春。長貧疑造化。已老厭風塵。直道難容世。虛名只誤人。扁舟即歸去。吾豈戀秋蓴。

暮春

四海尚風飈。千門轉寂寥。傳聞收土地。思見復征徭。節士心肝在。將軍髀肉消。何時聽野老。鼓腹頌唐堯。

次韻楊德中見寄

五月大江滿。白波如白雲。看山重約客。載酒試從君。竹所宜頻掃。桃源或未聞。龍蛇今已遠。麋鹿任爲羣。

送吳鼎文同知赴安州

別駕安州去。青天蜀道危。近辭丹鳳闕。遠過碧雞祠。暮雨歸神女。春風怨子規。宦遊多好思。重和杜陵詩。

送愚上人歸越中并簡奎方舟長老

天界歸來亦已遲。庭松此日定回枝。山中結社無靈運。海上留衣有退之。鶴去雲霄隨錫杖。龍收風雨入軍持。西湖若見方舟老。為說三年夢裏詩。

送王克讓員外赴陝西

貂裘萬里獨衝寒。舊是含香漢署官。白雪作花人面落。青山如鳳馬頭看。關中相國資王猛。海內蒼生望謝安。應念東南有遺佚。采芝深谷尚盤桓。

典麗似李東川

寄內弟陸熙之

我別禦兒溪上宅。月當二十四回新。如何故國尚戎馬。卽恐比鄰非昔人。簫鼓誰家猶作社。樓臺廢苑不成春。夜寒憶爾無由見。悵望黃姑析木津。

句法流轉

卽事

少海旌旗落照中。沙陀兵馬雁門雄。朝宗久廢諸侯禮。翊戴方尊節度功。今日豈宜求騎劫。當年應失倚全忠。丹書鐵券存終始。萬古山河帶礪同。

此詩似為擴廓帖木兒作。騎劫全忠指貂高開保等。

經故內

山中玉殿盡蒼苔。天子蒙塵豈復迴。地脉不從滄海斷。潮聲猶上浙江來。百年禁樹知誰惜。三月宮花尙自開。此日

登臨解題賦。白頭庾信不勝哀。

哀艷不減宋文恪過故宮之作

錢塘秋夕

殘蠟無光小院幽。梧桐一樹更蕭颯。西陵風雨來清夜。南國山河入素秋。雞唱四鄰呼客夢。雁回千里帶邊愁。可憐季子貂裘敝。遲暮何為賦遠遊。

雨中書懷

漢苑秦宮跡已陳。金沙一簇為誰新。山河有恨空懷古。風雨無情只送春。南國鷓鴣愁北客。東家蝴蝶過西鄰。尊前莫唱昇平曲。白髮秋娘也自顰。

讀胡笳曲

卜年已到甲辰終。休倚山河百二雄。八駿何勞巡海上。一

龍今見起江東。專門學士空談道。仗鉞將軍競策功。忍聽胡笳舊時曲。此身飄泊嘆秋蓬。

春思

兩河兵合盡紅巾。豈有桃源可避秦。馬上短衣多楚客。城中高髻半淮人。荷翻太液非前日。花落蕃禧又暮春。莫上高樓望西北。哀笳聲裏正風塵。悽惋之中復饒秀潤

蜀山圖

連峰接岫寫秦州。雨洗蛾眉積翠浮。石出劔門皆北向。水通鹽澤自西流。松頭幾片秋雲溼。鳥背千盤細路幽。策馬匆匆度關客。何如漁父一扁舟。又觀海詩云石壁三更看日上星槎八月到天回亦潤壯

送莫彥英赴賓州上林丞

十月西征天氣寒。兩江今日靜波瀾。蠻夸萬里皆唐制。齊魯諸生盡漢官。榕葉似雲垂滿戶。荔支經雨喜登盤。柳州刺史文章妙。公退從容好細看。

送楊九思赴廣西都尉經歷

邛笮康居路盡通。西南開鎮兩江雄。漢家大將推楊僕。蠻府參軍見郝隆。象跡滿山雲氣白。雞聲千戶日車紅。明珠薏苡無人辨。行李歸來莫厭窮。沈確士云。卽此鄉多寶玉。慎勿厭清貧。意工於脫化。

送詹同文承旨還鄉

奉天殿下親承詔。老著黃冠出紫薇。萬里雲霄雙鶴去。時苑縱二鶴。九江風浪一帆歸。春前載酒黃泥坂。月下吹簫赤壁

磯。文采昭回看帝製。山中草木盡光輝。

次韻方文敏秋興

一自龍飛濠泗間。橐駝牛馬走闔顏。已來肅慎通滄海。更卻呼韓閉玉關。使者旌旗分道出。將軍部曲凱歌還。白頭野老知何事。紫氣常瞻萬歲山。

送馬伯溫之廣西

樓船椎鼓發江中。昨夜檣烏喜北風。可惜春歸還送客。何知別後已成翁。浮天雪浪三湘濶。到海雲山百粵通。有子漢陽專簿領。一緘千里託飛鴻。

爰山隱居夏日

病客從教懶出村。兩山一月雨昏昏。野花作雪都辭樹。溪

水如雲。忽到門。無復元戎喧鼓吹。試從田父牧雞豚。來青處士時相過。猶是平原舊子孫。三四晚唐風韻

送朱質夫赴寧遠知縣

萬里番禺自漢通。乘槎有客氣如虹。地分銅柱風烟外。山涌瓊臺雪浪中。帝子旌旗何處問。黎人衣服與時同。興來好和蘇公語。又度西南月半弓。

二月一日病中口號

新年猶苦病相侵。華髮蕭蕭自滿簪。五柳先生蓮社約。四明狂客鏡湖心。滿城風雨花時過。曲水東西草色深。今日兩峰茆屋下。故人攜酒一開襟。

寄陳性天

沈疇天壇事老君。即從年少悟元文。青童汲井朝分乳。玉女裁衣夕染雲。水上赤魚還可駕。山頭白鶴自成羣。遙知客去能長嘯。月冷天空半嶺聞。

東村漫興

溪畔秋風老。拒霜居人星散似。淮鄉誰家十五琵琶女。就客能彈陌上桑。寫亂後景象若不用力而婉憫動人

附錄

劉永之十四首

永之字仲修清江人父應奇知歸州仲修少隨父宦游治春秋學能文詞家富於貲元末四方兵起日與郡人楊伯謙梁孟敬彭聲之輩講論風雅當世宗之

洪武初徵至金陵入禮局宋濂稱其詞翰雙絕仲修
竟以耳疾辭歸嗣子奉坐事死縣官籍其家仲修亦
徙東萊至桃源病卒仲修好書甚篤篆楷行草皆有
法因自號山陰道士所著有山陰集五卷

梁孟敬曰仲修遺詞發詠迨金琢璧鉅篇短章矩度
悉合

敖子發曰山陰翁詩諸體皆工而七言絕句尤佳不
徒深入簡齋門戶亦可與晚唐諸賢白戰於變風境
上而莫雌雄者

朱錫鬯曰仲修集中與梁孟敬論春秋書謂胡氏之
春秋非經之本旨自爲一書可爾使聖人者若後之

法吏深文而巧詆蔑乎寬厚之意此其失非細故也
其識出汪環谷趙東山諸君之上其詩務去陳言取
材新穎頗近姚少監鄭都官

汪端論曰仲修詩猗猗明潤楚楚清發絕句如羚羊
掛角無跡可求堪與松雪連鑣雲林接軫鐵門諸子
罕此雅音

舟中懷友

浮雲無定姿青陽易消索。渡口人獨歸雨中花盡落風急
賈船稀春寒客衣薄所念同心友天涯尚漂泊
沙際水痕交細草蒙茸長春江下連雁夜雨同孤舫佳期
違宿諾歡笑懷前賞餘燼落寒燈臥聞漁版響

山澗讀易軒

環環碧澗連。靡靡蒼山屬。初日照林端。春禽鳴布穀。松深
有去雲。苔靜無來躅。獨把一編書。時向窗間讀。

劉宗海為余作清江春雨碧嶂秋風二圖賦此贈之

劉君早年喜山水。得意往往圖樵漁。西昌城南一相見。貽
我素縑雙畫圖。圖中似是清江曲。春雨蒼茫汀樹綠。烟中
髣髴辨飛帆。水際依微見茆屋。漁郎繫船江石上。一夜磯
頭水新長。孤村日暮烟火微。渡口歸人暝。猶往碧嶂層巒
翠。轉奇嵐光秀。色含朝暉。風林落葉灑青壁。雲壑流泉生
翠微。我昔結廬此山裏。每愛秋嵐淨如洗。經年奔走厭風
塵。偶看新圖心獨喜。憑君添我小綸巾。明當歸埽山中雲。

他日君來一相訪。松根為子開柴門。

送吳德基

春江望不極。芳草綠江濤。千里長沙道。孤帆去客心。縣城
依水國。吏語帶蠻音。到日應無事。華亭自鼓琴。

溪山漁艇圖

夕陽延暮景。秋色遠冥冥。流水雙溪綠。寒山九疊青。石樓
依古木。草徑接遙汀。釣叟長年在。何人問客星。

畦樂園

郭南抱甕者。久與世情疎。砌長龍鬚草。林開燕尾渠。轆轤
花下轉。蒿苳雨中鉏。蔗熟能相寄。酬君籛葉書。

題鄒惟中西樓

西樓遠對鼎山斜。野客來尋駕鹿車。竹嶼暝烟浮翠黛。石田秋雨潤銀沙。清尊未酌心先醉。往事重論髻欲華。肯借溪南三畝宅。從君學種邵平瓜。

同聲之宿蕙樓齋臨別賦簡

故人共宿幽齋小。扁竹花開映紫蒲。采閣暝傳浮水箭。金城朝建相風烏。朱絲鏤管書苔紙。銀篋秋衾夢橘湖。明日棹船金水去。煩君臨別贈文無。顧星五云麗而不縛由其骨高文無當歸草也用得韻

北澗夏日

酒傾蘭勺石泉香。衣剪荷盤露氣涼。誰料十年江海興。閉門疎雨對橫塘。

題畫鷹

猶記鳴鞘出霸陵。新豐市北醉呼鷹。於今豪氣都消盡。閑看新圖剔雁燈。

題彭子弭漁釣圖

彭郎磯畔小茆堂。露滿秋林木葉黃。石渚水生魚欲上。一江風雨夜鳴榔。冷雋

偶成

烏絲細寫蠶頭篆。白紵新裁燕尾衫。雨過西軒苔色淨。澗中雲影似江帆。

送人

金鳳洲頭倒玉壺。銅塘浦口送飛艫。他時若記分攜處。花

滿春城聞鷓鴣

甘瑾二十首

瑾字彥初臨川人元末張承旨翥僑居雲錦山中與
彥初及張可立甘克敬往還酬和翥嘗評彥初詩如
美女簪花可立詩如貞婦守節時稱臨川詩派彥初
洪武時為嚴州府同知或云官翰
林待制
汪端論曰彥初專工律體辛酸婉麗饒故國舊君之
思殊近玉溪江東風格惜其始終無考遺集罕傳茲
於諸選本中采之吉光片羽彌足珍重

題何梅閣山居

迹不到城市逢人無厚顏一瓢風外樹雙屐雨中山流水

春喧確歸雲暮掩關憂時心未已祇益鬢毛斑

題高伯昌遠遊卷

九月朔方城河流已涸凝瓊車馳犯雪乳梳飲兼冰汗血
宛西馬奇毛代北鷹良材資國用翹首即飛騰

題張氏竹園別業

避難疎狂客長貧少定居採芝空有曲種樹豈無書擬製
東山屐看馳下澤車肯容疎懶迹來與狎樵漁

秋閨怨

惆悵下簾鉤庭空月影流錦衾成獨旦羅扇覺先秋火熱
薰籠煖泉寒汲綆修祗憐雲際雁傳得玉關愁澄懷曰初
唐高唱

贈人戍襄陽

漢水荒城外。頻年汗馬場。舟車通饋餉。部曲雜耕桑。幕府
文書暇。烽樓警邏長。山公有愛將。日醉習池旁。譏武備廢弛也

讀靖康遺事

杜鵑啼老洛城東。烽火郊畿縱犬戎。廟略合收淝水捷。鹵
盟誰定渭橋功。銅駝故陌迷芳草。黃屋驚塵捲朔風。一自
鼎湖龍去後。小臣何地泣遺弓。

讀史有感二首

二龍悵望杏東遊。弓劍蒼茫滿地愁。青草空遺雙塚月。彩
雲已散六宮秋。長江落日忠臣恨。易水寒風壯士羞。楚漢
興亡俱一夢。當時何用割鴻溝。

汴流西繞漢時宮。陵樹蕭蕭易朔風。金盃不冰銀雁去。銅
仙無露玉盤空。御溝流水人間碧。禁苑蟠桃海上紅。却憶
晉家南渡客。清談不記誤和戎。

題余忠宣公請援兵書卷後

大將分符自朔庭。出師江漢肅南征。賀蘭不救睢陽厄。無
忌難收鄴下兵。脣齒百年誰復恤。簡書千里漫多情。西風
一劍英雄淚。已逐寒江日夜聲。

寄馬彥會

百戰孤城血未乾。故人書札報平安。秋風代馬思燕草。夜
月湘歌怨澧蘭。萬里江湖仍旅食。百年天地自儒冠。山陰
更有誅茅處。仗劍休辭行路難。

寄張可立

明三才詩選二集卷一
旅泊他鄉有歲年。南塘水竹卜居偏。得錢日閉君平肆。載酒秋尋賀監船。葭葦近通門底巷。荆榛遙對郭西田。東歸亦有蓴鱸興。矯首滄浪若箇邊。

題洞泉觀

流水橫橋小洞門。亂來遺跡暗消魂。劔沉舊井龍湫廢。碑斷陰崖鶴塚存。落日樵蘇歸古道。西風禾黍入孤村。扶桑海水今清淺。應待麻姑爲細論。

西師

中興實藉羣公力。反正終歸萬姓心。霧雨銅標蠻徼濶。山河鐵券漢恩深。明珠翡翠殊方入。天馬蒲萄遠使臨。北極卽瞻佳麗氣。南雲足聽凱歌音。

春日登高有懷

風景蒼茫大野陰。懷鄉倦客此登臨。十年魚雁將家遠。二月鶯花濺淚深。天落湖山雲水散。地連閩粵瘴烟侵。躬耕却憶窮廬叟。梁甫栖栖日暮吟。

清明

輕寒天氣半晴時。隴麥畦桑綠漸肥。誰與試烟傳蠟燭。且謀沽酒典春衣。晚風門巷桐花落。新水池塘燕子飛。吟罷不堪搔短髮。杜鵑祇解促春歸。

雨中書懷

南窗坐掩讀殘書。落盡梨花雨點疎。短夢或因中酒後。輕寒已過禁烟餘。芹香墮几初歸燕。泉脉通池欲上魚。搔首

故人懷別久。欲憑尺素問何如。

讀余廷心傳

海風吹浪集樓船。百戰疲兵僅數千。但許有身堪報國。豈知無力可回天。幽燕北望王師遠。江漢南來地勢偏。天塹已空豪傑沒。朔雲邊雪事茫然。

次張文學韻寄涂貢士

畫角城頭曲未終。十年哀怨萬方同。黍離正恨傷周切。章甫翻憐適越窮。黃葉空山僧舍雨。滄浪衰鬢釣絲風。閑愁欲遣三千斛。濁酒寧辭一百筒。

長沙夾夜泊

漠漠蒹葭斷渚連。烽亭亭鼓報更傳。迴風吹樹纜初繫。斜月照篷人未眠。雁足寄書懷歲晏。蟹螯新酒及霜前。蒼茫遠浦寒燈外。尚有漁郎夜扣舷。

登擬峴臺

高臺俯仰大江馳。南盡甌閩樹影微。白草秋烟遺戰骨。青天寒照落人衣。襄陽耆舊心如昨。華表仙翁事已非。東望故園三百里。不堪搔首片雲飛。

俯仰與懷所謂詩到亂離工也

明三十家詩選二集卷一下

錢塘 汪端 允莊輯

張以寧 六十一首

以寧字志道古田人家翠屏山下自號翠屏山人元
 泰定中舉進士歷官郡邑世亂留滯江淮間順帝徵
 為國子助教累至翰林學士承旨明師取元都例徙
 南京召對稱旨復授侍讀學士洪武二年奉旨使安
 南封其主陳日燿為國王御製詩一章賜之甫抵境
 而日燿卒國人乞以印詔授其世子志道不聽留居
 洱江上諭世子告哀於朝且請襲爵既得命俟後使
 者至然後入境將事事竣教世子服三年喪命其國

人效中國行頓首稽首禮太祖聞而嘉之賜璽書比諸陸賈馬援再賜御製詩八章及還道卒志道爲人廉潔不營財產奉使往還襪被外無他物少有俊才博聞強記擅名於時本以春秋登第故所學尤專春秋多所自得撰有春秋尊王發微八卷春王正月考一卷辨疑一卷其詩文有翠屏集四卷

宋濂極推重其文爲作序

陳廷器曰學士詩沉鬱雄健者可追漢魏清婉俊逸者足配盛唐

徐子元曰志道高雅俊逸超絕哇眡翠屏千仞可望不可躋

汪端論曰志道格兼唐宋諸體皆清剛雋上一洗元

季繼縟之習後來閩派如林子羽等俱不逮也惜其身受順帝知遇自外吏擢居侍從元社旣屋則爲黃殷士伯顏子中之捐軀完節可也爲楊廉夫張光弼之辭爵隱居亦可也皆不出此而以衰暮餘年臣事二姓其出處不能不與危太樸素同譏然太樸以自稱老臣見薄卒至貶死和州而志道奉使南荒不辱君命覆身有黔婁之被垂橐無陸賈之金用志道自挽詩中語則其清節足嘉而隕身遠道頗備哀榮遭際視太樸亦幸矣至其晚歲諸詩自恨爲名高所累濡忍不死蓼莪麥秀悽愴縈懷則其心跡較太樸爲可諒亦猶國朝婁東之於虞山也

峨眉亭

碧酒雙銀瓶。獨酌峨眉亭。不見謫仙人。但見三山青。秋色淮上來。蒼然滿雲汀。欲將五十弦。彈與蛟龍聽。沈確士云何減太白

題畫

山雨瀑如雪。林寒松未花。遙看飛閣起。知有梵王家。一僧歸去晚。雲濕滿袈裟。

崖斷石林合。風高雲葉飄。人歸雨脚外。高閣望中遙。應是天台路。幽期在石橋。

寒月白千峰。林深路絕踪。遙知僧定起。疎響在高松。亦欲剡溪去。其如山水重。自不更歸。氣於分。天賦。碧。星。限。然。黃。

送重峰阮子敬南還

君家重峰下。我家大溪頭。君家門前水。我家門前流。我行久別家。思憶故鄉水。何況故鄉人。相見六千里。十年在揚州。五年在京城。不見故鄉人。見君難為情。見君情尚爾。別君柰何許。送君遽不堪。憶君良獨苦。君歸過溪上。為問水中魚。別時魚尾赤。別後今何如。沈確士云情致纏綿神似飲馬長城窟詩

題石仲銘所藏淵明歸隱圖

昔無劉豫州。隆中老諸葛。所以陶彭澤。歸興不可遏。凌敲讌功臣。旌旂蔽輜輳。一壺從杖藜。獨視天壤濶。風吹黃金花。南山在我闕。蕭條蓬門秋。稚子候明發。豈知英雄人。有志不得豁。高詠荆軻篇。颯然動毛髮。澄懷曰別有懷抱

遊句容同林景和縣尹子尚規登僧伽塔賦

嵯峨崇明塔。拔地一千丈。我攀青雲梯。倏到飛鳥上。微風韻金鐸。初日麗銀榜。維時十月交。葉脫天宇曠。羣山東南奔。平川疊波浪。雲間三茅峰。園立儼相向。碧瓦浮鱗鱗。茲邑亦云壯。雞鳴四關開。攘攘異得喪。塔中宴坐僊。憐汝在塵埃。古時登臨人。今者亦何往。俯觀世蜉蝣。仰嘆彼龍象。乃知崑崙顛。可以小穹壤。同游皆雋英。超遙寄心賞。霜飈天際來。毛髮颯森爽。太白去千年。吾何獨惆悵。

夜飲醉歸贈王伯純是日王得容程子初同飲

歲云暮矣客不樂。青雨亭前翫孤鶴。城頭昏昏雲下垂。竹外騷騷雪微作。亭中王郎風格奇。愛竹愛雪仍愛詩。開尊酒好客更好。坐中王程俱白眉。紅爐照閣生春霧。詩思騰騰天外去。玉姬舞倦回風來。吹倒三山見瓊樹。馬蹄蹴響客歸時。留我更盡金屈卮。塵空祇覺乾坤白。飲醉那知賓主誰。坐聞一聲兩聲折。攜燈起看竹上雪。瑤華翠色森陸離。人影銜光共清絕。卻歸覓紙醉自題。烏啼古寺風淒淒。明年此夜知何處。興發還應訪剡溪。

澄懷曰冷豔

贈黃山如晦上人

朗公相見廣陵春。自言家世黃山人。老夫疇昔黃山客。江海見之情轉親。坡陀石上層波雪。徧海蓮峰白於月。新詩句句鬪清妍。高詠長風動疎樾。清晨言別索題詩。我衰詩減黃山時。春潮日夕海門去。爲報山中耆舊知。

題馬致遠清溪曉渡圖

明三才詩選二集卷一
四
今晨高臥不出戶。歲晏黃塵九達霧。美人遠別索題詩。眼
明見此清溪之曉渡。溪旁秀林昨夜雨。落花一寸無行路。
歌闌桃葉人。斷腸艇子招招過。溪去紅日青霞半。晦明白
雲碧嶂相吞吐。詩成君別我亦歸。此景宛是經行處。我呼
九曲峰前船。君帆正渡瀟湘渚。雁去冥冥黃葉村。猿啼歷
歷斜陽樹。是時美人不相見。我思美人美無度。美人之材
濟時具。我老但有滄洲趣。他日開圖思我時。溪上春深采
芳杜。

秋江漁父圖

江風搖柳雲冥冥。小舸釣歸潮滿汀。賣魚得錢共秋酌。白
酒船頭青瓦瓶。樵青勸酒漁童舞。擊甌唱歌無曲譜。船前

野鴨莫驚飛。我有竹弓不射汝。落落有逸致

閩關水吟

閩關之水來隴頭。排山下與閩溪流。閩溪送客東南走。直
到嵩溪始分手。客居溪上雲幾重。鳥啼月出門前松。天風
吹雲數千里。飄颻直度長江水。清淮浩蕩連黃河。碧樹滿
地黃雲多。夢中長記關山路。隴水潺湲似人語。覺來有書
不得將。海潮不上嵩溪陽。平原春晚生芳草。杜鵑聲裏令
人老。行人歸來動十年。潺湲隴水聲依然。安得湘弦寫嗚
咽。彈作相思寄明月。

題進士卜友曾瘦馬圖

卜侯喜我詩。袖出瘦馬圖。前有杜陵瘦馬行。令我閣筆久

嗟吁。憶昔馬齒未長日。金羈躩蹠鳴天衢。逐景虞泉日未
晡。羲和頓轡喘不蘇。石根一蹶亦常事。誰遣逸足輕夷途。
霜風大澤百草枯。飲齧不飽長毛疎。相者舉肥汝苦瘠。委
棄乃在城東隅。病類有時磨古樹。翻蹄無力哀平蕪。當年
笑殺紫燕愚。中路清涕流鹽車。嗟哉此馬世罕有。駑駘多
肉空敷腴。骨格稜層神觀在。頗類山澤之仙癯。解劍贖汝
歸。伯樂今豈無浴之萬里流。秣以百束芻。昔惜花白春雲
鋪。氣全或比新生駒。持之西獻穆天子。尚與八駿爭先驅。
此等題最易落套以翻案法寫之便不覺衰頹

題綠繞青來巷

炎歊一月詩久廢。忽驚山水墮我前。一灣瑤環綠宛轉。兩

葉娥黛青連娟。青來綠繞各自媚。使我當暑神翛然。云是
仲德隱君之棲居。迺在螺女江上城東偏。南陽使君喜此
卷。銀鈎玉唾相新鮮。我聞李愿盤谷。王維輞川。伊人胸中
瀟洒。自岩壑所以山水有意。爲人妍。我友李景陽。邀我題
詩篇。好山好水人更好。想是三神島嶼。巢神仙。我遊金焦
望遠海。一別九仙今十年。白蘋鷺下動明月。碧蘿猿掛啼
蒼烟。更待涼風蕩餘熱。卽下嵩江覓釣船。

答豫章劉文若進士見贈并謝蘇昌齡徵君

昨日出城風日暄。今日雨聲早閉門。陰晴百歲手翻覆。長
歌君詩擊我尊。昔年之春上京國。曉趨闔闔觀朝元。搏桑
出日麗黃道。析木聚星環紫垣。馮侯作歌君屬和。我起鑿

節清心魂。五年相望不相見。萬事別來難具論。鬢邊青絲已霜色。衣上紅塵唯酒痕。瓊花開時廣陵市。豈意共君同笑言。眉山座上爛熳酌。三人歡好如弟昆。縱談夙昔若夢寐。仰視明月低崑崙。起攜數友逐清賞。雜遝鞍馬城西村。江流地上白浩浩。山落烟際青渾渾。醉懷磊砢傾欲盡。世慮皎潔醒終存。覩君佳兒宛在側。雜佩婉孌紉芳蓀。老親稚子隔天末。安得不使心憂煩。感君相寬佩君語。期君去我高飛騫。飢鴻嗷嗷紛在野。我曹一飲皆君恩。此身尙未溘朝露。誓將毫末酬乾坤。澄懷曰志道七古骨力道健才氣排宕發源杜陵出入遺山道園之間可以獨張一軍

題張起原舟中看山圖

張侯往年官衡州。州之名山無與儔。蓉旌羽節降白日。紫蓋石廩騰清秋。侯也愛山得山趣。似是昔時王子猷。每憐馬上看草草。不得獨往探奇幽。茲辰歸來好風色。熨平翠縠鋪湘流。中流容與沙棠舟。舟中傲睨紫綺裘。青山喜人不肯走。一一自獻當船頭。掀髯轉盼領其妙。誰與知者雙蜚鷗。明霞返照儼不動。白雲翠烟相與浮。獨不見巴船捩柁水如箭。盤渦轂轉令人愁。好山縱有豈暇賞。急電一瞬過雙眸。古來會心亦良少。千年幾見斜川遊。絕憐詩句餘秀色。我起高詠心悠悠。朱郎落筆宛飛動。毋乃親見此景不。嗟侯之意我亦有。艇子况繫溪南洲。秋山石上芝草長。我獨胡爲此淹留。

題蘇昌齡畫

徐君遠從西江來。親爲蘇子作松石。松三千年鐵作膚。石亦蒼寒太古色。幾枝老木相因依。氣格不敢與之敵。洲有搖搖者舟子。短棹滄江蕩晴碧。着子歎歌於其中。仰觀青天岸白幘。是時東山月始出。無邊露氣連赤壁。潛蛟出舞巢鵲翔。江妃色動三太息。眼中之人有太白。風雲變態俱無跡。前輩風流今復聞。人間絕景豈易得。徐君更爲添野夫。共泛靈槎臥吹笛。

題揚子第八港韓氏十景卷

白霄趙子詩句好。三年不見心惛惛。清晨小卷到我前。萬里江天淨如掃。揚州城高雲氣秋。八公騎鶴時下遊。焦山丹井夜光歇。鐘聲曉入江南洲。埋輪人去英雄泣。至今忠憤春潮急。枉渚維舟竟日橫。行人喚渡移時立。絲絲垂柳鬱金黃。渺渺流輝組練長。殘陽欲沒明月出。神山二點青螺光。港口歸帆如鳥翥。雪暗江村不知處。浦寒蓑白一漁歸。沙爭江清羣雁聚。金山山前揚子津。舟中來往逐風塵。江靈絕景閱之久。持似瀟洒江居人。草堂無貲髮欲白。我與趙子俱爲客。起來書罷十景圖。目送飛漚下江碧。

宿籌嶺

昔者屯兵盛。甌閩此地分。清時無寇盜。比屋樂耕耘。澗響不知雨。山高都是雲。明朝見親舍。一笑慰辛勤。

舒嘯軒

幽居蒼竹林。長嘯白雲岑。自吐虹蜺氣。人聞鸞鳳音。野烟
喬木晚。江雨落花深。亦有東臯興。何當一抱琴。

江干

江干望不極。樓閣影繽紛。水氣多爲雨。人烟遠是雲。子生
何濩落。客路轉辛勤。楊柳牽愁思。和春上翠裙。

題山水圖

山水坐來見。翛然無俗氛。碧岩虛夜月。江樹靜秋雲。帆影
烟中度。猿聲雨後聞。自憐歸未許。遙憶武夷君。

泊湖頭水長

客路春將晚。征帆日又曛。深山昨夜雨。流水滿溪雲。渡黑
漁舟集。村空戍鼓聞。故園頻夢去。植杖已堪耘。

題聽鶴亭

仙鶴在塵世。長鳴思遠空。有人秋水。上倚杖。月明中。玉樹
三更露。銀河萬里風。徘徊意無極。遲爾出樊籠。格意俱高

泊戚家堰遇風夜雷雨

高浪出魚龍。舟師急捲篷。雷聲過雲雨。月暈斷河風。野澗
人家外。濤喧客枕中。坐來搔短髮。惆悵大江東。

舟中聽雨

今夜初聽雨。江南杜若青。功名何鹵莽。兄弟總彫零。遠夢
愁胡蝶。深情愧脊令。撫孤終有意。身世尚流萍。

安南卽景

龍水南邊去。行穿萬竹林。羊腸山險盡。蝸角地蟠深。銅柱

千年恨。星槎萬里。心朝來晴好。景綠樹響春禽。

長蘆渡江往金陵

春日三竿上翠屏。曉風五兩下蘆汀。水兼天去無邊白。山過江來不斷青。沙觜湖迴平雁跡。海門雨至帶龍腥。後庭無復當年曲。睡起漁歌倚柂聽。

嚴子陵釣臺

故人已乘赤龍去。君獨羊裘釣月明。魯國高名懸宇宙。漢家小吏待公卿。天回御榻星辰動。人去空臺山水清。我欲長竿數千尺。坐來東海看潮生。沈確士云。明人詠嚴陵者。以此章為最。

送僧遊杭

銅駝夜泣苔花冷。銀雁秋飛寶氣消。曾共殘僧披舊跡。尚

憐。故老話前朝。衲隨猿掛。雲生樹杯。趁鷗還。月上潮師去。新詩如見寄。白沙翠篠赤闌橋。悲壯秀琢。兼擅其勝。

高郵

長陂雲氣滿淮東。下隱蛟龍萬仞宮。湖岸樓臺連海上。水田杭稻似吳中。古藤酒醒春風在。甕社珠寒夜月空。四海昇平須進酒。賣魚柳畔見南翁。

寄廣西參政劉允中

重臣授鉞殿南邦。五月旌旗過上江。青帶碧簪環畫省。綠沉金鎖護油幢。峒丁萬笠春耕野。海估千帆曉渡瀧。銅柱崖前相憶處。尺書難寄鯉魚雙。

錢塘懷古

荷花桂子不勝悲。江介繁華異昔時。天目山來孤鳳歇。海門潮去六龍移。賈充誤世終無策。庾信哀時尚有詞。莫向中原誇絕景。西湖遺恨似西施。澄懷曰賈充指賈似道。庾信指汪水雲等。

過辛稼軒神道弔以詩

長嘯秋雲白日陰。太行天黨氣蕭森。英雄已盡中原淚。臣主終無北渡心。歲晚陰符仙蠹化。夜寒雄劍老龍吟。青山萬折東流去。春暮鶻啼宰樹林。稼軒奇士此詩能表其志節。

送帖僉憲赴北山

大寧城郭枕江雄。前代豪華在眼中。山外貔貅閑夜月。海東鷹隼待秋風。天圍松嶺雲垂幙。霜下金源水若空。益訪民風上天子。勿忘家世是元功。瑰麗

題觀弈圖

松風冉冉羽衣輕。石上談棋笑語清。樵客豈知人世換。山童遙指海塵生。碧桃落盡又春去。白鶴歸來空月明。一着山中猶未了。人間流落不勝情。

秋登九江廟晚眺

黃花開後葉初霜。紫蟹肥時酒滿缸。羈旅已知浮世淡。登臨未覺壯心降。天垂去鳥低平楚。水學驚蛇到大江。目極孤雲鄉思亂。烟波空想白鷗雙。

夜泊獨柳次韻王尹子

霽月中天見絳河。黃流滿地漾金波。荒陂野火兼漁火。短棹吳歌雜楚歌。去雁已連家信杳。閑鷗豈識客愁多。江南

二月花如海獨負歸期奈爾何。

常山縣

喜近閩山南去路樓臺兩岸水迢迢不知曉店三竿日猶
夢春江半夜潮吏少縣庭常聞寂戍還驛舍尚蕭條平安
寫就無人寄家在溪南第一橋。

答張約中見問

哀遲久讓祖生鞭寂寞猶存鄭老璫金馬隱來人豈識木
雞老去我方全坐移棠樹庭前日夢到榴花洞裏天多謝
故人勞遠問濫竽博士又三年。

臘月夢還家侍親

喜著萊衣侍越吟覺來猶未脫朝簪五更霜月到家夢十
載風塵爲客心山遠秭歸啼更苦海乾精衛恨猶深幾時
萬斛潺湲淚盡酒墳前柏樹林。

感懷

雪落西樓虎滿村鬢髭變白赤心存徒薪肯信當時策負
米徒傷此日魂啼老杜鵑山月苦歸遲遼鶴海雲昏早知
只學東方朔避世長依金馬門。蒼涼惘欸讀者可以悲其志矣

桃源春曉圖

溪上桃花無數開花間春水綠於苔不因漁艇尋源入爭
識仙家避世來翠雨流雲連玉洞丹霞抱日護瑤臺幔亭
亦有虹橋約問我京華幾日回。與觀奔圖作皆宛轉清便有流風迴雪之致

過吳江有懷

三。高。堂。下。綠。蘋。風。十。載。維。舟。兩。鬢。蓬。范。蠡。無。書。留。越。絕。張
翰。有。夢。到。吳。中。雲。開。笠。澤。浮。珠。闕。月。出。長。橋。動。綵。虹。忽。憶
故。人。心。斷。絕。五。羊。南。去。少。飛。鴻。

封川縣次韻典簿牛士良

記。取。今。年。重。九。日。封。川。水。驛。掛。帆。過。秋。風。嶺。外。黃。花。少。暮
雨。尊。前。白。髮。多。起。接。野。僧。談。梵。典。臥。聽。溪。子。和。蠻。歌。少。游
款。段。成。何。事。至。竟。男。兒。是。伏。波。

情。事。未。申。視。息。宇。內。劬。勞。之。旦。哀。痛。倍。深。悲。歌。以。繼
慟。哭。所。謂。情。見。乎。辭。云。爾。呈。閭。初。陽。天。使。牛。士。良
典。簿

一。身。絕。域。已。凄。然。三。處。離。居。更。可。憐。中。歲。恨。孤。蓬。矢。志。暮

豔。刃。心。誦。蓼。莪。篇。愁。深。鶯。墮。蠻。溪。外。夢。斷。鶉。啼。宰。樹。邊。悔。不
阿。奴。長。在。側。盡。情。家。祭。過。年。年。

渡江

幾。載。途。中。月。窺。愁。酒。半。酣。送。人。楊。柳。色。今。日。是。江。南。

題青山白雲圖

仙。館。白。雲。封。青。山。第。幾。重。道。人。時。化。鶴。巢。向。最。高。松。
長。愛。青。山。好。行。行。入。翠。微。今。朝。山。頂。上。下。看。白。雲。飛。

題月落潮生圖

參。橫。天。末。樹。陰。收。風。響。蘆。根。海。氣。浮。人。語。漸。聞。燈。漸。近。誰
家。江。上。早。歸。舟。

過桐廬

江邊三月草淒淒。綠樹蒼烟望欲迷。細雨孤帆春睡起。青山兩岸畫眉啼。

有感

馬首桓州又懿州。朔風秋冷黑貂裘。可憐吹得頭如雪。更上安南萬里舟。

泊沽頭

楚客歸心河水流。三更月暈長年愁。沙河雨漲催開閘。半夜櫓聲無數舟。

感懷

早逐浮榮老未歸。便歸故國已全非。人生只合藏名姓。白首青山一布衣。
感慨深遠妙在自然

玉山縣店題壁

淮水風高雁影微。澄江潮細鯉魚稀。客愁正怯天涯雨。花落青林聞柝歸。

浙江亭沙漲十里

重到錢塘異昔時。潮頭東擊遠洲移。人間莫任三千歲。滄海桑田幾許悲。

遇故人胡居敬臨江府送至新淦

共酌簷花細雨前。淒然重見此江邊。停舟莫怪難為別。能幾人生二十年。

翠竹蒼松映白沙。清江西畔是君家。明年歸路重相問。分食東陵五色瓜。

東昌

麗日初抽宿麥芽。暖風吹草綠平沙。江南老却春多少。二月東昌見杏花。

題小景

雀啅平田秋稻花。晚風吹柳一行斜。漁舟細雨獨歸去。白石滄江何處家。

題江神廟壁

碧瓦紅橋翠浪間。江風縹緲動烟鬟。神雞不逐雲中去。啼殺清秋月滿山。

附錄

劉崧二十六首

崧字子高江西泰和人。洪武三年舉經明行修。授兵部職方司郎中。奉命徵糧鎮江。鎮江多勲臣田租賦。爲民累子高力請得少減。遷北平按察副使。輕刑省事。招集流亡民。咸復業。立文文山祠於學宮之側。勒石學門。示府縣勿以徭役累諸生。嘗請減僻地驛馬。以益宛平。帝可其奏。謂侍臣曰。驛傳勞逸不均久矣。崧能言之。牧民者不當如是耶。尋爲胡惟庸所惡。謫輸作京師。後放還。十三年。惟庸誅。徵拜禮部侍郎。擢吏部尙書。雷震謹身殿。帝諭羣臣。陳得失。子高以德行仁對。尋致仕。明年召爲國子司業。未幾卒於官。子高幼博學。天性廉慎。家素貧。兄弟三人共居一茆。

屋有田五十畝及貴無所增益居官未嘗以家累自
隨之任北平攜一僮往至則遣還晡時吏退獨處一
室孤燈讀書往往達旦尤嗜爲詩日賦一章豫章人
宗之爲西江派云有槎翁集十卷又有北平八府志
北平事蹟

王元美曰劉子高如雨中素馨雖復嫣然不作寒梅
老樹風骨

顧文玉曰子高虛澹不墮習氣

朱錫鬯曰子高句鏤字琢頗具苦心惜其體弱局於
方程不能展拓於唐近大歷十子於宋類永嘉四靈
於元最肖薩天錫

虞山曰國初詩派西江則劉槎翁閩中則張翠屏槎
翁以雅正標宗翠屏以雄麗樹幟

汪端論曰子高詩妍靜疏爽如新籜搖風幽花浥露
又如空山聽雨曲礪鳴泉蓋取材中唐南宋而不流
於佻淺洵一時雅宗也

姑蘇曲

姑蘇城頭烏夜啼。姑蘇臺上風淒淒。芙蓉露冷秋香死。美
人夜泣。雙蛾低。銅龍咽寒更漏促。手撥繁絃轉紅玉。鴛鴦
飛去。屨廊空。猶唱吳宮舊時曲。淒豔似
温飛卿

東方行

東方閃閃啼早鴉。美人愁眠隔窗紗。桐華樹下人來往。銀

床。輶。轡。夢。中。響。

游三華山

龍門兩山負。一水下迴繞。蒼峽忽中開。飛橋出林杪。盤盤石磴引。巖巖松林窅。危闌正西挂。層閣復東繚。樹暗盡含雲。花明忽聞鳥。懸厓傍架棧。鑿石潛通突。早聞三仙人。棲化跡已杳。常疑雲月上。顏色靚清皎。丹井舊時深。朝真亂來少。荒壇翳霜蕪。虛館闕叢篠。懷賢慨重憩。振翼思遠矯。佳境能娛人。何因致清醪。

送樓徵士叔真歸金華

祖帳出都門。鴉啼掖垣曙。春從天上歸。人望山中去。離亭煙柳變。極浦風帆暮。亦欲把蘿衣。空傷別璫樹。

題余仲揚山水圖爲余白安賦

金華山人余仲揚。筆墨蕭疏開老蒼。昨看新圖湖上宅。煙霧白日生高堂。層峰上蟠石。皜皜絕島下。瞰江茫茫長松竝。立各千丈間。以灌木相低昂。松下上人坐碧草。秋影忽落衣巾涼。囊琴未發絃未奏。已覺山水聲洋洋。赤城霞氣通雁蕩。巫峽雨色來瀟湘。誰能千里坐致此。欲往久歎河無梁。風塵漲天蔽吳楚。六年悵望神慘傷。玄猿苦啼崑北樹。白雁不到江南鄉。赭山焚林絕人跡。如此山水非尋常。此圖本爲自安寫。亦感同姓悲殊方。幽軒素壁泉聲動。對此令我心爲狂。何由捫蘿逐麋鹿。振衣直上雲中岡。登臨一寫漂泊恨。長嘯清風生八荒。

題溪山春曉圖寄贈蕭翀

土山戴石石角傾。偃樹雜出如幢旌。青天微茫曉色動。雨
氣合沓千峰晴。野橋西邊有村路。之子鳴鞘踏雲去。重巖
花發似聞香。隔水鶯啼不知處。東南連年飛戰塵。如此山
水何清新。石田到處長荆棘。豈有荷耒春耕人。我昨西游
登武姥。手挾雲霞望仙府。把酒忽逢東海生。醉臥溪南紫
蘿雨。紫蘿陰陰覆巖屏。十日尋幽行未歸。雲峰流泉半空
落。六月飛雪霑人衣。拂衣歸隱知何日。却對畫圖心若失。
不聞流水渡溪還。時見浮雲向山出。懷哉桃花修竹林。江
海秋高煙霧深。豈無耕釣在田野。誰識悠悠沮溺心。

題曾郁文所藏山水小景

隔溪望見林間屋。沙澗陰陰俯羣木。溪流合處一橋孤。春
雨來時萬山綠。江南此景真可憐。米家筆意誰能傳。却憶
故廬珠浦上。短籬長繫釣魚船。

清明對酒

榆火報清明。雲天霽色生。菱花愁夜雨。桑葉愛春晴。燕說
興亡恨。蛙占水旱聲。可能忘世慮。呼酒聽流鶯。

舟夜次查口柬蕭鵬舉

扁舟沿綠壘。雙櫓折蒼波。秋氣水邊早。月明江上多。魚龍
今夜冷。鴻雁幾時過。去住關幽興。欵眠聽棹歌。

玉華山

翠巘千峰合。丹厓一徑通。樓臺上雲氣。草木動天風。野曠

行人外。江平落雁中。傷心俯城郭。煙雨正冥濛。

寄范實夫

細雨柴門生遠愁。向來詩帖若為酬。林花落處頻中酒。海
燕飛時獨倚樓。北郭晚晴山更遠。南塘春盡水爭流。可能
相別還相憶。莫遣楊花笑白頭。

寄萬德躬

日暮山風吹女蘿。故人舟楫定如何。呂仙祠下寒砧急。帝
子閣前秋水多。聞海烽塵鳴戍鼓。江湖煙雨暗漁蓑。何時
醉把黃花酒。聽爾南征長短歌。格調 閔朗

雲亭蕭氏園池次韻

竹裏雛鷺盡日啼。高梧涼覆小池西。麝香眠處殘花落。蛺
蝶飛時碧草齊。一水風迴湘佩合。三山雲壓楚鬟低。冰盤
宴客清陰裏。石上詩成拂蘚題。

訪王子讓大村幽居借書戲題壁間

村前流水碧迴環。村後荒城隱可攀。當戶雨苔雙石古。隔
江煙柳數峰閑。杖藜麥隴秋霜後。尊酒茆堂夕照間。聞有
異書人少見。柴門客去又長關。

峭壁蘭

崑石下陰陰。猗蘭綠如剪。花發人不知。秋香入苔蘚。幽絕 秀絕

月夜舟行

遠林煙冪冪。宿草露涓涓。沙渚鷺初起。漁舟人未眠。

青山白雲圖

石林煙霧冷冥冥。一舸西風過洞庭。日暮白雲飛去後。江
南無數亂峰青。澄懷云子高七絕宋
人中最近姜白石

石塘山家

隴麥高低逕路斜。小池楊柳帶人家。東菑午餉柴門靜。一
犬籬根臥落花。

題江景畫

澗邊白石明於雪。林下清風冷似秋。落雁圓沙江路轉。短
篷煙雨憶曾游。

題會同可畫水

輕濤暗浪互奔驅。極浦蒼煙澹有無。欲采白蘋愁日暮。一
帆秋雨過南湖。

松雲軒

何處飛來野鶴羣。踏翻松頂翠紛紛。清陰不動涼如水。白
掃綠苔眠白雲。

君子堂夜起

風亂殘燈自掩扉。夜寒游子歎無衣。池南落盡芙蓉葉。滿
地月明霜正飛。

步月

乘涼步月過西鄰。草露霏微溼葛巾。一徑竹陰無犬吠。飛
螢來往暗隨人。靜境

書所見

橋跨平湖一鏡開。羣鷗欲下正徘徊。蕭蕭蘆葦層冰上。猶

有樵人踏雪來

窺圃

園瓜寒蔓早離披。山藥秋藤已倒垂。小雨暗沾花下徑。閑雲深護竹間池。

題三岡寺

石橋流水帶人家。紫殿春陰閣岸沙。啼鳥數聲山雨歇。門前落盡白桐花。

郭奎十一首

奎字子章。巢縣人。嘗從余忠宣公闕學。治經忠宣亟稱之。世亂飄零江湖間。太祖爲吳國公子。章來歸。從事幕府。皇姪朱文正開大都督府於南昌。公叩子章參

其軍事。乙巳歲。文正得罪。子章坐誅。有望雲集五卷

王元美曰。參軍帥幕風流詞藻清麗。究其品格在張

徐之次

朱錫鬯曰。參謀詩格清剛。句無浮響。頗近汪忠勤

烏夜啼

石頭城上烏。遙夜鳴相呼。紫清道士有兩樹。烏啼不離樹。高處千聲啞啞復。萬聲中。堂酒闌。夢未成。呼童把燭起。開戶。照樹惟恐鄰人驚。庭前再拜爲爾說。我家舊住長淮北。慈親已老返哺違。零落猶爲異鄉客。嚴霜滿天。江月輝。東方未白。羣星稀。明朝日出當早飛。莫使涕淚沾裳衣。沈着悱惻

送孫良玉還同安

送君江上去。山路雨初晴。落日平淮樹。春潮帶皖城。酒因今日醉。人是故鄉情。莫說王孫怨。芳洲碧草生。

歲暮

寒。月。出。在。戶。江。城。雁。獨。飛。愁。人。不。能。寐。鄉。淚。忽。沾。衣。邱。隴。十。年。別。星。霜。兩。鬢。稀。爲。言。叢。桂。老。歲。暮。憺。忘。歸。

琴溪

吾慕琴高子。當年此隱棲。松雲生峭壁。山雪漲迴溪。古跡行人識。新春好鳥啼。學仙誠有道。安得謝輪蹄。

秋興

月下清砧響。夜闌征人不寐憶。長安霧迷南國游。魂泣草沒中原戰。骨寒直望明河臨。象闕誰霑零露捧。金盤十年

關塞無家別。杖策猶悲行路難。

西巖訪舊

鷓鴣聲中宿雨晴。白雲閑傍馬頭生。東鄰茅屋新煙起。南澗石橋春水平。野老見多還問姓。山花開盡不知名。故人家近青松下。未到柴門已出迎。

臘日

臘日三年爲異客。今年霜雪未全饒。風塵暗滿淮南路。霧雨寒生江上潮。鄉夢有時逢骨肉。此身何處托漁樵。共來吳楚交兵地。烽火依稀似六朝。

山中喜晴

山中十日苦風雪。霧雨作寒纔放晴。千澗水從松杪落。半

明三才詩選二集卷一
空雲逐馬頭。行居人向暖。分茶樹啼鳥。知春喚客名。不惜
看花兼問酒。東風歸路布袍輕。

宿雨

宿雨蕭蕭悴客心。高窗連日滯秋陰。一枝未遂鷓鴣託。四
壁應愁蟋蟀吟。家在淮南青桂老。門臨湖水白蘋深。鯉魚
風起香秔熟。釣艇誰撐近竹林。

臥病

多病文園渴未消。自從人日遇花朝。不知楊柳將春色。綠
到淮南第幾橋。

寄劉彥基

九月征人未授衣。年年書到故園稀。無情恨殺相天雁。不

帶平安一字飛。

劉炳十一首

炳字彥昂鄱陽人。倜儻知兵。元末兵亂。與弟煜結里
閭相保。寇至輒却走。依余忠宣於安慶。以其孤軍不
振。辭歸洪武。初獻書言事。授中書典籤。出爲大都督
府掌記。除東阿知縣。閱兩考。引疾歸。久之卒。有詩集
五卷。楊維禎爲評點。極推重之。

宋景濂曰。彥昂工力旣深。摹擬輒似如璞玉輝。春蟻
珠浴月。

危太樸曰。彥昂馳騁戎馬。決勝籌帷。有古烈士風。故
其詩悲壯沈鬱。

汪端論曰子章彥昂詩擣藻風華寫懷淒鬱脫去凡
近古意獨存雖未足八面應敵亦壇坫之偏裨也

秋夜詞

銀床露滴梧桐葉。紫殿香銷水沈屑。玉簫吹罷晚妝殘。半
捲珠簾拜新月。

春夕直左掖懷周侍御

晚雨池上晴。透迤澹將夕。金莖華月生。綺樹流雲溼。窗虛
漏聲永。幔捲爐煙襲。憶我同袍人。何由共瑤席。楊廉夫云仿韋

左掖門朝退呈吳待制諸公

謬忝金閨籍。聯班趨晚朝。透迤西上門。窈窕長安橋。殘雪
帶遠樹。夕陽明山椒。不有同袍者。疇能慰寂寥。

游丹青閣

橋南楊柳綠成行。出郭尋僧到上方。城拱煙霞開錦繡。山
圍松竹奏笙簧。半簾晚翠涵溪閣。一枕秋雲護石床。安得
遠公同淨業。白蓮池上挹天香。

寄許永明公冕昆季得夫先生

少年會共請長纓。雲壓旄頭劍氣腥。諸葛有心扶漢室。包
胥無淚哭秦庭。九鰲夜徙龍沙黑。八駿秋迷鳥道青。一別
關河俱白首。斷腸煙樹滿遙汀。

燕城懷古

廣寒宮殿玉爲樓。萬歲鰲峰壓九州。番國胡僧青鼠帽。天
魔宮女綵龍舟。鈎陳蒼闕山南拱。太液紅橋海北流。惟有

瀟溝舊時月。年年鴻雁不勝秋。

題蘇子卿像

穹廬十九年。坐臥持漢節。歸來兩鬢斑。疑帶天山雪。

聞魯志敏訃音

故國猶傳箭。中原未解戎。遙聞故人死。雙淚落秋風。

同周伯寧連榻劇談悲歌有感

醉來拔劍斫珊瑚。回首侯門是畏途。夜半聞雞眠不得。草

堂秋雨讀陰符。

登懷云
悲壯

泊瓜洲懷舊寄顧利賓王又新

湖聲月色滿江船。回首春風十六年。憶得石橋楊柳巷。珠

簾銀燭聽歌眠。

東湖憶舊

蕭家巷口花如霧。紅粉闌干酒旆斜。記得少年曾繫馬。如
今無樹可棲鴉。

明三十家詩選二集卷二上

錢塘汪端允莊輯

楊基九十四首

基字孟載其先蜀之嘉州人大父官江左生於吳中
家天平山南赤城之下幼穎敏絕人九歲背誦六經
著書十餘萬言名論鑒試儀曹不利會天下亂歸隱
赤山與高季迪諸人相倡和至正末客張士誠叅軍
饒介所太祖下蘇州以饒氏客安置臨濠徙河南洪
武二年放歸尋起知滎陽縣謫居鍾離用薦爲江西
行省幕官坐省臣得罪落職居句曲山中復起奉使
湖南召還授兵部員外出爲山西按察使後被讒奪

職供役卒於工所孟載少負詩名會稽楊廉夫來吳
孟載於座上賦鐵笛歌卽效鐵厓體廉夫驚喜與俱
東謂從游者曰吾在吳又得一鐵優於老鐵矣歿後
詩多散失吳人張習訪求編次得十二卷名眉菴集
江東之曰孟載詩穠麗蔚健大有唐人風味

張企翺曰國初以高楊張徐比唐之四傑故老言不
惟文才之似而其攸終亦不相遠眉菴盈川令終如
一太史之斃同乎賓王幼文雖不溺海僅全腰領而
非首邱司丞投龍江又與照鄰無異噫亦異矣

顧玄言曰廉訪才長逸宕思多雋永
朱錫鬯曰孟載五古足與季迪方駕

沈確士曰孟載七言短古原本李頎常建清逸可喜
汪端論曰孟載五古具韋柳之冲逸韓蘇之峭拔近
體皆秀藻清潤風度倏然其絕人處尤在才鋒英銳
神致俊爽了無晦澁填砌之病求之宏正嘉隆間此
才正未易得也特其少爲鐵厓所賞無題香奩諸詩
頗沿其派是以王鳳洲誦其情至之語風雅掃地王
敬美詆爲草昧之雄不中與季迪作僕朱竹垞又摘
其七律似詞語者至數十聯後人遂目爲王百穀王
次回之流不復躋諸作者茲選嚴汰其纖艷之作以
見孟載自有真詩論古者不宜以耳代目也

感懷

璞玉宜深藏。白雪乃寡和。和寡非所悲。銜玉徒取禍。奈何
別足者。抱璞不知過。進非烈士忠。退耻愚夫懦。備春匪利
直。販鬻欲自浼。山中一尺雪。且復掩扉臥。

清霜凋百草。亦令脆者堅。士不遇患難。智慮何由全。立德
髀肉生。重耳十九年。一爲三國雄。一爲五霸賢。苟不辨菽
麥。何足攬大權。至今巴蜀人。歎息後主禪。

鄧禹南陽來。仗策歸光武。孔明臥隆中。不卽事先主。英雄
各有見。何必問出處。孫曹與更始。未可同日語。向非昭烈
賢。三顧猶未許。君子當識時。守身如處女。

一女不得織。三人歎無衣。一夫不暇耕。八口皆啼饑。饑寒
迫於身。誰能不爲非。西伯善養老。仁人爲己歸。霜寒草木

落。禽鳥相背飛。民心亦何求。在於得所依。此理勿暫失。君
子慎其微。

鵲巢知避歲。終爲鳩所居。巧者勞不足。拙者安有餘。溪翁
夜結網。山人朝煮魚。隆准入關中。不讀半卷書。當時微張
韓。乃與勝廣俱。大拙乃至巧。巧者復何如。

驂駟日千里。亦在御者功。向無造父能。乃與凡馬同。韓彭
芑駕材。驅策遇沛公。增本渥洼兒。意不與項通。豈獨知馬
難所貴。御馬工。駕御苟失宜。鮮不敗乃翁。蕭蕭帳下驂。千
駟何足雄。

鞞鷹歛六翮。栖息如鷦鷯。秋風颯然至。聳目思凌霄。英雄
在承平。白首爲漁樵。匪無搏擊能。不與狐兔遭。長星亘東

南壯士。拭寶刀。落落丈夫志。悠悠兒女曹。

善鬪須扼吭。善戰須搏膺。楚不都關中。卒為漢所傾。洛陽非用武。况乃居彭城。曹公失荊州。致使吳蜀爭。五馬渡江南。神州終不平。元師破襄陽。宋社忽已更。制勝在得勢。勿云險可輕。澄懷曰。諸詠不必規仿子昂。感過太白古風。而議論精警。獨開生面。可以規作者抱負。

陳平

陳平素無行。終為漢相國。陰謀固可鄙。奇計凡六出。後來諸呂難卒賴。陸賈力豈緣。富且貴。臨事意反訕。智者猶若斯。請為愚者說。名言至理

叔孫通

禮樂治化本百年。然後興。奈何叔孫通。綿葛為可行。布衣

起山東。五載帝業成。瘡痍有未起。詎可謂治平。當時定朝儀。事正擊柱爭。遂令後賢王。禮樂終不明。漢道止於斯。俗儒良可輕。

秋夜言懷

鮮鮮籬邊菊。撼撼庭下蕙。蕙氣日已銷。黃花自妍麗。復恐清商激。幽芳亦凋瘁。褰衣步廣除。露白月在地。鵲飛林影空。蟲語墻陰細。昔賢悲絲染。往聖嘆川逝。少壯不我留。臨風發長喟。

送陳資深歸廣

丈夫輕別離。投老欲入廣。奈何干戈際。萬里涉沆漭。茲城頗阜庶。有女供奉養。世亂得粗安。胡勞問鄉鄰。君言苦無

明三才言選二集卷二
四
家。一夕魂九往。鄉書昨日至。捧讀屢泚頰。四喪寄淺土。未
得掩諸壙。雖云弊廬在。誰復修祀享。感茲歸意迫。無力猶
勉強。齒髮固已衰。尙足嬰擾攘。敢忘鄉土情。偷安戀茲壤。
吾聞重感激。惜別復加賞。天寒霜露繁。撼撼枯葉響。水宿
慎蛟螭。山行避魍魎。田園雖荒蕪。果實羅栗橡。鄰居喜均
還。相邀具醅盎。酒薄不得醉。且復歌慨慷。人生還鄉樂。無
物堪比彷彿。喜極繼以悲。歡戚同反掌。番思蘇臺月。照女夜
績紡。此時父子情。兩地同恂怳。安得混車書。妻孥共羅幌。
茲事竟難期。淚眼一悽愴。我家嘉陵江。蹤跡久飄蕩。亦欲
問前途。逡巡覓西瀼。平平叙去委婉真
樸處正自難到

登靈岩和韻周左承伯温饒大叅介之

單。爐集羣英。席窄坐每盍。烟橫半掩寺。木落全見塔。斜流
出。渠分曲徑。轉溪合村粧。妍醜並野話。悲笑雜童操。吳音
聞。僧作梵偈答。霜苔滑難躋。露棘朽易拉。橙紆蠹綠樹。扉
敞蝸啓闔。娛賓列五豆。禮佛過三帟。晴崖暝憂雨。秋洞寒
疑臘。窗攀盜果。猿簷入避鷓。鴿掬池萍沾。袖憩石蘚汚。衲
琴忘荒臺。弄屣響回廊。踏值險慮思。筇得奇卽傾。榼感深
怒。須磔愁極衰。鬢颯華年倏。川駛雅量浩。海納嘯歌激。欸
歎雄辨肆。交沓禪寂虛。無量道祖清。靜蓋叩囂蝸。觸蠻變
幻。雀化蛤。狂遊類飲酎。薄宦避嚼蠟。終當謝塵鞅。掃屋分
座榻。奇峭非深於
昌黎者不能

雨中效韋體寄道衍

叢林翳重岡。迢遞僧居獨。憑軒一悵望。春雨靡蕪綠。泉香
花落礪窗暝。松圍屋。憶爾諷經餘。袈裟坐深竹。

初夏過寧真道院

偶來高樹下。獨坐青苔石。澗雨落餘霏。衣裳淡生碧。道因
微物悟。理向立言析。習靜自無營。何妨處囂寂。

湘女

湘水綠瀾瀾。湘山碧峩峩。空明影上下。但覺魚鳥多。我方
駐輕橈。聽彼湘女歌。湘女佩幽蘭。徐行拂青莎。春風吹衣
裾。芳香動微波。淑質自妍麗。不待綺與羅。真修慎所適。窮
窳山之阿。盈盈青樓婦。日暮將如何。澄懷曰孟載詩有豪
氣有秀骨有木色不
是一味穠麗所
以異於女郎詩

贈毛生

丈夫遇知己。勝如得美官。棲棲無聊中。握手意便懽。古來
豪傑人。所就非一端。狂言與危行。初若不可干。從容兩陣
間。一語九廟安。狐貉不外飾。而足禦大寒。嗟嗟隴西李。願
識荊州韓。似少含蓄而
英爽可喜

吳宮遺跡八詠錄三

滄浪波

入苑綠泱泱。縠紋融暖光。東風吹白浪。照見赤龍堂。龍堂
負貝闕。陰火春波熱。鮫人賣髻綃。夜夜唱明月。

長洲春

縠波流暖雲。花光艷綠蘋。津頭洗紅女。蝴蝶上羅裙。羅裙

秋水上。明璫搖白粲。飛下雙鴛鴦。溘溘潮水響。

梧宮夜

桐堦白露下。濕螢光炯炯。銅盤燒蠟黃。秋衾夢魂冷。粉淚
鈿華滴。雲鬢新蟬整。何處玉鑿聲。芙蓉笑孤影。三詩奇麗似長吉

雨中期袁宰不至

晨興罷巾櫛。撫卷對秋渚。幽人期不來。值此瀟湘雨。呼童
掃庭蕪。落葉深幾許。更採石田芝。空齋遲君煮。

寄內婉素

天寒思故衣。家貧思良妻。所以孟德耀。舉案與眉齊。憶汝
事我初。高樓映深閨。珠鈿照羅綺。簪珮搖玉犀。梳掠不待
曉。妝成聽鳴雞。中吳昔喪亂。甘口各東西。有母不得將。獨
汝與提攜。我復竄遠方。送我當路啼。紛紛道上人。無不爲
慘悽。今年我還家。赤手無所賫。汝亦遇多難。典賣罄珥笄。
朝炊粥一盂。暮食鹽與藿。堂有九十姑。時復羞豚蹄。膏沐
弗暇澤。髮落瘦且顰。別來復秋深。露下百草淒。破碎要補
綴。甘旨需醬醢。安貧兼養老。此事汝素稽。作詩遠相寄。新
月當窗低。

舟中有感

水性日就下。大江日東馳。不知舟行遠。但覺青山移。我方
念儔侶。手反坐拄頤。天風吹衣裳。明月來相隨。乘流非不
任。逝者乃如斯。滔滔適意中。忽然令人悲。壯歲難再得。修
名安可期。

送方以亨還吳興

草有不可偃。木有不可彫。人心非秋蓬。安得隨風飄。憐君玉雪姿。明月當清宵。葳蕤紫荊花。輝映非一朝。噫噫寒江雁。去去誰能招。

賢女失之陋。壯夫失之貧。相逢無所遺。慷慨不得伸。臨歧歌短章。所道皆苦辛。淮陰未去楚。江總復仕陳。聊沽客中酒。用酌還鄉人。占勁磊落誰謂孟載詩氣格卑耶

發南浦

開船別西山。迤邐向南浦。帆輕去自速。初不用篙櫓。蒼蒼烟中樹。橐橐響斤斧。一女沙上汲。衆漁洲畔語。我行葳云晏。况復遠儔侶。回首北歸鴻。翩翩下寒渚。

過小孤

大孤俯如盤。小孤儼而立。羣山如從使。左右相拱揖。孤根屹撐拄。萬竅爭噴噏。瀏瀏陰風旋。慘慘元氣濕。江流亘其下。震怒莫敢汲。洑爲盤渦深。馳作奔馬急。躋攀或失手。一駛不可及。我來值秋晚。木落衆鳥集。勿爨夜船犀。鮫人抱珠泣。

望南岳

我從匡廬來。但覺諸山低。嗟峨望衡岳。雲霄與之齊。下有赤蛇蟄。上有朱雀棲。仰瞻祝融拔。俯揖紫蓋迷。五嶺皆培塿。三江爲泮蹄。巍然南服尊。嵩霍相提攜。封秩崇君稱。諸神咸朝躋。丹書篆寶冊。萬古封金泥。百王重祀典。赤繅藉

玉圭自非精靈通。牲帛勞焚賫。余方向遠道。無由陟層梯。
蒼蒼烟霞中。喔喔聞天雞。緬思昌黎伯。恭默開雲霓。靈貺
自昭格。誠敬良可稽。斯人久云沒。感念徒含悽。典重與
題相稱

湘江道中懷王常宗

暮江散微雨。風定波自碧。一鷺立不飛。雙鷗似相識。餘烟
菱女唱。新月漁郎笛。此處忽懷人。相思杳何極。

遠浦歸帆

輕帆挂春風。倒映湘江綠。天低浦溆遠。歸向誰家宿。遙指
落花西。黃陵廟前屋。

洞庭秋月

湘水秋更清。湘月秋更白。光輝一相蕩。水月不辨色。何處

洞簫聲。巴陵夜歸客。

夜過市汊驛有懷幕中諸友

驛樓枕迴洲。湍汊聲活活。霜蘆花猶繁。烟柳葉漸脫。月出
鳧雁鳴。孤榜寒江闊。何處寄相思。浮雲楚天末。

廢宅行

弓刀掛墻旗拂瓦。行人過門須下馬。日暮將軍縱酒歸。白
棒橫街人亂打。朱門一閉春草積。官印斜封泥浣壁。守卒
收蝦屋後池。鄰翁晒麥堦前石。簾幕當年盡綺羅。網絲顛
倒腐螢多。杏梁風雨丹青濕。時有野鳩來作窠。樓臺易成
還易廢。前年猶是桑麻地。

聞鄰船吹笛

江空月寒露華白。何人船頭夜吹笛。參差楚調轉吳音。定是江南遠行客。江南萬里不歸家。笛裏分明說鬢華。已分折殘堤上柳。莫教吹落隴頭花。

登岳陽樓望君山

洞庭無烟晚風定。春水平鋪如練淨。君山一點望中青。湘女梳頭對明鏡。鏡裏芙蓉夜不收。水光山色兩悠悠。直教流下春江去。消得巴陵萬古愁。

長江萬里圖

我家岷山更西住。正見岷江發源處。三巴春霽雪初消。百折千回向東去。江水東流萬里長。人今漂泊尚他鄉。烟波草色時牽恨。風雨猿聲欲斷腸。連上二章用筆清倩不著點塵

夢綠軒并序

余與徐君幼文同謫鍾離。結屋四楹。幼文居東楹。余居西楹。又嘗賦詩有夢裏綠陰幽草之句。蓋深有意於故園也。因題其室曰夢綠。

蜀山江頭萬章木。細草幽泉蔭修竹。五月六月山雨晴。空翠紛紛滿衣綠。杖藜或來陰下行。雲影不斷涼風生。青連翠結欲無路。彷彿上有黃鸝鳴。去年吳城正酣戰。却倚危樓望蔥蒨。今年放逐到長淮。萬綠時於夢中見。夢中見綠覺始知。索我亦賦夢綠詩。逢人說夢子堪笑。替人作夢余何癡。南風剽然吹夢破。樹頭不知微雨過。從今寤寐兩俱忘。靜與白雲相對坐。

皂角灘

烟蘿豔珍樹蒙鬆夏綠更換春花紅。千山萬山何所聽。鷓鴣杜宇啼春風。穹崖爛熳高百尺。快劍無痕鑿翠碧。寶氣朝疑五色霞。丹光夜燭三分日。我從章江出彭蠡。巴陵長沙洞庭尾。看遍衡廬兩岸山。行盡瀟湘一江水。輕舸短楫辭零陵。似與亂石爭功能。牛刀慣熟中肯綮。郢斧神捷廻鋒稜。男兒性命固可惜。底事矜誇向羣石。鷗邊短草一枝筇。牛背斜陽數聲笛。似放翁入蜀紀行詩

食燒筍題陳惟寅竹間

春雷一聲萬簪玉。參差亂迸莓苔綠。麻衣來掃葉當徑。燒何異。燃真煮秋菽。登盤查牙玉版肥。焦尾碎剝蒼龍皮。開樽

好侑新釀熟醉寫林間燒筍詩。風趣殊近坡公

清溪漁隱

清溪秋來水如練。歷歷魚蝦皆可見。綠蓑酒醒雁初飛。風急蘆花吹滿面。溪南一帶是青山。逢著垂楊便可灣。謾道白鷗閑似我。漁舟更比白鷗閑。

湘中見春雁

靡蕪葉長春簇簇。雙雁忘機相對浴。東風何事不飛歸。應念江南芳草綠。燕山密雪正茫茫。况有桃花水滿塘。畢竟不如歸去好。楚雲湘雨是他鄉。

湘中題畫

湘江澄澄漢江綠。芷葉蘭花映斑竹。一聲欸乃雁雙飛。數

點青山淨如玉。蒼梧南望是荊州。楚語吳雲恨未休。無夢可聽湘女瑟。有人方倚仲宣樓。

夏夜有懷

重露澄秋色。輕風生夜涼。碧看湖草亂。紅愛渚蓮香。有弟徒相憶。何人不異鄉。悲笳在城上。雙淚落衣裳。

秋齋雜賦

劉表知先主。懷王識沛公。未聞收夏口。先已入關中。今古車書異。興衰歷數同。方驚雞作鳳。當信鷺非鴻。今日長洲苑。秋風列羽旗。不圖新約法。復見舊威儀。鼓舞兒童樂。歌謠父老悲。烟埃方袞袞。禾黍正離離。嘆息馮唐老。吁嗟李廣賢。窮通元有命。生死詎非天。鼓角

西風裏。江湖短髮前。南飛有鴻雁。一字若爲傳。

晚樹霜猶碧。秋花雨未黃。戎衣輕繡錦。旅食尙糟糠。驛路千山隔。河流一葦航。毋憂兵不戰。已定法三章。

邏卒去不返。行人愁未回。正須犀作甲。毋用玉爲杯。清淚尋常落。丹心早晚灰。交仍期管鮑。書或似鄒枚。諸詠得杜一鱗片甲

偶題

身懶交遊絕。時危感慨新。清江催短髮。芳草怨歸人。花落縱橫雨。鶯啼淡蕩春。欲搖舟楫去。波浪沒平津。

送王仲容之官上海

薄宦依東海。孤城隔戍烟。花疎寒食後。人遠暮帆前。深巷編蒲履。斜崗種木棉。毋煩厭荒寂。微祿有畚田。

方氏園居

由來種瓜地。隨處即青門。習俗羞營利。甘貧耻受恩。掛蓑
秋樹濕。濯足晚溪渾。欲訪韶年友。漂零只自存。

江村雜興

陋巷泥三尺。無人訪隱淪。窗鳴風滅睡。炊斷雨添貧。野路
花迎客。江橋柳送人。暫須依薄俗。憩此竄餘身。

送句曲劉少府回揚州

家具一車輕。囊書與短檠。吏多難別意。人有去官情。帆影
江沉寺。簫聲月到城。竹西尋舊業。雨綠蕪生。

立夏前一日有賦

漸老綠陰天。無家怯杜鵑。東風有今夜。芳草又明年。蠶熟

新絲後。茶香煮酒前。都將南浦恨。聊寄北窗眠。巧而不織。

岳陽樓

春色醉巴陵。闌干落洞庭。水吞三楚白。山接九疑青。空濶
魚龍氣。嬋娟帝子靈。何人夜吹笛。風急雨冥冥。沈確士云
應推五言

射鵬手起結
尤入神境

入永州

石氣陰才霧。嵐霏暖欲霞。憩床腥畏虎。飲澗毒防蛇。紅葉
秋崖樹。青蘿晚洞花。江山盤屈外。遙認兩三家。

零陵

古瓦籠山葛。荒碑仆石楠。江晴初漲雨。城午未銷嵐。甕富
鯖羞鹿。杯渾酒餉蚶。邦人盡麻桌。終歲不知蠶。一詩善
言風土

湘中雜言

鄂渚雲歸後。巴山雨過時。鶻啼湘女廟。花落楚王祠。家遠身如夢。愁多鬢易絲。聊將身暫泊。沙嘴看鷓鴣。

城近江臨郭。沙虛月在川。柳宜春雪後。花怯晚風前。野麋三家市。鄉音幾處船。坐聽磯下水。清夜響湘絃。

指點鷗飛處。人間是岳州。湘潭山亂出。江漢水爭流。深竹新祠宇。飛花舊酒樓。平生巴楚夢。明日洞庭遊。

溪山小隱 澄懷曰此詩或作高季迪誤

何處溪山隱。衡門對野橋。晚風攜鶴子。春雨種魚苗。小徑斜通竹。疎籬曲護蕉。人生閒自足。不用楚辭招。

晚過秋浦

斜日雨晴天。江村正可憐。碧雲初見雁。紅樹尚聞蟬。一望皆秋色。千山各暮烟。自慚簪組累。羞近釣魚船。

湘中作

鷗聚江初靜。鴉啼樹已昏。碧湘悲帝子。芳草怨王孫。帆影烟中浦。漁燈雪後村。匆匆萬里客。極目正銷魂。

寓江寧村居

醉舞狂歌四十年。老來參得小乘禪。東風未濕墻腰雪。細雨微添石眼泉。無數白鷗閑似我。一江春水碧於天。莫言竺澤非彭澤。定擬金川是輞川。

春日白門寫懷用高季迪韻

遠歸偏惜窳餘身。多難番為異姓親。前度劉郎非故物。當

時燕子總西鄰家貧母老難為客酒薄愁深不醉人走向
津頭看春色綠波芳草却傷神

寄張學錄孟兼揭應奉孟同二文學

何用聰明萬卷書自須卑陋一塵居草於閒處生偏密花
到春深看漸疎綠水滿渠澆藥後青山無數卷簾初相過
莫道柴門窄細柳高槐可蔭車

送魏萬之安西

澄懷曰此詩或作林子羽誤

梁苑微霜木葉紅行人此日發關東客中怨別看長劍馬
上驚心見斷蓬雲散岳蓮開太華月寒郊樹隱新豐窮秋
亦有臨邊使待爾題詩寄塞鴻

卓然唐音

省垣對雨有懷方員外

煮得新醅灑灑紅省垣誰與晚樽同人當暫別情偏惡詩
到無聊語更丁江浦荷花雙鷺雨驛亭楊柳一蟬風論文
若過虞楊地應對清江憶范公

鏤刻處不入小家

舟中聞鄰船吳歌有懷幼文來儀

輕帆短楫泝烟波疊渚回舟柁遠何一路詩從愁裏得二
分春在客中過江通漢水晴偏綠山入湘雲晚更多何處
思君腸欲斷楚妃祠下聽吳歌

風度如落花依草

途次感秋

嫋嫋西風吹逝波冥冥灑氣逼星河宣王石鼓青苔澁武
帝金盤白露多八陣雲開屯虎豹三江潮落見鼉鼉沉湘
一帶皆秋草欲采芙蓉柰晚何

結二句含思深婉得柳州之神百讀不厭

答李仲宏寫懷次韻
春來渡口足風波。獨立船頭舞短蓑。高柳忽驚啼鳥變。故園應是落花多。尋人不敢門題鳳。愛客都將字換鶯。祇有屋西山數疊。也應憐我醉時歌。

春暮有感

春色鮮明不稱貧。越羅川錦照烏巾。斜陽芳草遲遲晚。流水桃花去去春。萬里歸心鷗送客。片時閒夢鳥催人。五湖風雨烟波濶。便著青蓑採白蘋。

郡齋養病

小軒新沐喜神清。短幘單衣覺漸輕。松下琴書晴亦潤。竹西窗戶晚猶明。愁來對酒心先醉。病後看花意懶行。却憶

故山深處立。綠蘿千樹叫流鶯。

赤山書事寄謝隱君子蘭

曾向溪南看藝麻。竹杠堯子一肩斜。秧苗尚短仍含穀。荷葉纔高已上花。蠶屋柘烟朝焙繭。鵲爐沉火晝薰茶。而今風雨成拋絕。臥聽西園兩部蛙。

白雲深處爲天平圭上人賦

上人卓錫亂雲中。縹緲蓮花第幾峰。行盡崎嶇方見塔。望迷樓閣但聞鐘。四山曉氣層層雨。一徑秋陰曲曲松。幾度相尋問童子。水流花落竟無蹤。

客中寒食有感

客裏蕭條百尺天。衡陽城下柳陰船。野棠又濕初晴雨。芳

草仍含已禁烟。車馬看花悲昔夢。綺羅傳燭待明年。三吳
八桂東西路。萬里空山哭杜鵑。

桂林卽興

江爲池塹石爲城。南去蒼梧兩日程。碧殿尙存虞帝像。青
山不廢伏波名。蘭根出土長斜掛。榕樹成門却倒生。時有
苗人與徭女。負薪輸布事科征。

春暮

辛夷如雪照庭柯。老去愁驚日易過。芳草漸於歌館密。落
花偏向舞筵多。故人別後皆黃土。南浦春來又綠波。便欲
移家向曲住。采芝種玉此山阿。

贈張夢辰

手持三尺青琅玕。鼓枻來往臨風湍。放歌吳淞江月白。濯
足洞庭秋水寒。黃金何用鑄范蠡。紫尊自可供張翰。扁舟
吾欲拂衣去。晚汀共語收漁竿。物體頗峭健
存備一格

寄楊鐵崖

不見雲間楊鐵史。寮中七客近如何。老來詩句疎狂甚。亂
後文章感慨多。長笛參差吹海鳳。小橋楊柳舞天魔。春明
且盡嬉游樂。莫解梁鴻五噫歌。

浦口逢春憶金陵舊遊

春冰銷盡草生齊。細雨香融紫陌泥。花裏小樓雙燕入。柳
邊深巷一鷺啼。坐臨南浦彈流水。步逐東風唱大堤。還憶
當年看花伴。錦衣驄馬白門西。此種詩清綺有致自是佳
句竹垞概以浣溪沙中語

目之非
定論也

陌上桑

青青陌上桑。葉葉帶春雨。已有催絲人。咄咄桑下語。與聶六月禾未秀官家已修倉同慨

長沙雜詠

湘人愛樓居。斜枕湘江起。樓下倚闌人。簪花照春水。花深暝烟重。格格啼山鷓。燒響一燈來。人歸碧湘夜。

感春

夢裏綠陰幽。草畫中春水。人家何處江南。風景鶯啼小雨。飛花清麗。

遇史克敬詢故園

三年身不到姑蘇。見說城邊柳半枯。縱有蕭蕭幾枝在。也應啼殺樹頭烏。輕秀之詞饒有情韻

贈京妓宜時秀

欲唱清歌却掩襟。晚風亭子落花深。坐中年少休輕聽。此曲先皇有賜金。

鯉魚山阻風天甚寒雨皆成霰

江南天氣大無憑。草色烟光暖欲蒸。向晚鯉魚風乍急。盡吹小雨作春冰。

望武昌

吹面風來杜若香。離離烟柳拂鷗長。人家鸚鵡洲邊住。一向開門對漢陽。

月三二家詩選二集卷二

春風吹雨濕衣裾。綠水紅粧畫不如。却是漢陽川上女。過江來買武昌魚。二詩明麗如披着色山水

吳中行樂詞

單羅小扇夾紗衣。冠子梳頭插翠薇。知是范家園裏醉。無人戴杏花歸。想見承平風景

天平山中余家赤山相去不五里許

細雨茸茸溼棟花。南風樹樹熟枇杷。徐行不記山深淺。一路鶯啼送到家。

江西省看花次韻

生色屏風一面開。輕羅團扇合歡裁。深深院落青青柳。縱是無花也看來。

故山春日

千花萬萼委塵埃。只有茶蘼獨自開。應是鄰家更零落。過牆蝴蝶又飛來。

附錄

張羽二十七首

羽字來儀後以字行更字附鳳潯陽人從父宦游江浙兵阻不得歸因僑武林游吳後喜吳興山水與徐賁約卜居家於菁山元末為安定書院山長洪武初徵授太常司丞兼翰林院同掌文淵閣事十六年太祖自逃滁陽王事實命來儀撰廟碑當時以大制作推任如此十八年坐事竄嶺南未半道召還自知不

明三才家語選二集卷二十一
免投龍江死年五十三歸葬九里岡金華童冀銘其墓來儀善爲文學歐陽子縝密宛轉雖前輩自謂不及尤長於詩作畫師小米所著有靜居集四卷成化中吳人張習刻之

程孟陽曰來儀五言古詩學杜學韋各有神理非苟然者樂府歌行材力馳騁音節諧暢不襲宋元格調近體清圓渾脫不事雕績全是唐音

澄懷居士七姬權厝志論曰嘗觀古之史氏所載貞妃烈婦能識節義決死生而不顧者恒曠世而一見今乃於一家一日而得七人焉可謂奇矣此明潯陽張來儀七姬權厝志之所由作也而後之成敗論人

者因貶淮張遂貶元紹而并七姬死事之烈張來儀諸公表章之美亦多深文刻覈沒其苦心噫可慨已余考淮張奮身輕俠雄視東南旋降元授太尉歲輪糧於大都屢拜元帝龍衣御酒之賜不可謂非元臣也以無遠略卒爲明俘然其息民保境愛士重賢雖不受羅致者亦曾未戮辱之其度過明祖遠甚及其亡也老嫗猶呼爲張王則其遺澤在人實不異晉之張軌五代之錢鏐而被執不屈以死又與陳友定比烈是已不得以乘時竊據者擬之矣且夫明祖起自草澤與元爲敵潘元紹爲淮張之愛婿實爲元之陪臣義固不當帝明也當吳城圍急失利歸呼七姬而

明三才詩選卷二十一
語以受國重寄義不顧家何其壯也七姬卽相繼引
決旣以自明其志又以激元紹之必死可云烈矣而
論者以元紹降附明祖爲弗克踐言然考明史元紹
兄元明降明仕爲行省平章又署雲南布政司事而
不言元紹之仕明則元紹之未臣於明可知又考楊
廉夫詩注曰僞吳駙馬潘某國亡伏誅臺城廉夫同
時人所記當不誤夫於明爲伏誅卽於元爲殉國且
考明興雜記徐達破平江明祖令械元紹等至金陵
士誠對明祖語簡傲李善長痛詈之元紹有愠色明
祖謂逆黨終難制殺而梟首又僞吳雜錄元帥命元
紹勸士誠降乃密語士誠暫忍數日從者泄其語因

以詐降被殺是其處汗積慮冀得一當大事去矣人
之云亡七姬旣殉主於前而元紹終殉國於後曾何
嘗以後死負七姬哉若夫七姬之死謂出於元紹逼
迫論者多引楊升菴跋語爲證而升菴則專引高季
迪詩詞爲證夫季迪當日不應淮張之聘元紹爲張
氏親臣自與氣類不同故於七姬殉節事惟寓憑弔
而不詳始末此由心薄元紹然亦未嘗言其逼迫也
矧季迪天性貞介不妄涉筆觀其於淮張敗後僅有
吳城感舊一詩比以趙佗劉表亦頗如其分量非若
楊廉夫當淮張盛時有上張太尉諸詩及其敗後乃
稱僞吳及鐵篙子而貶之卽季迪與廉夫素稱不合

而全集中亦無一字及之則其生平筆墨矜重可知使七姬是時果因逼迫而死其事既不足傳季迪又何屑爲詩詞以悼之耶嘗觀成化間張習題季迪詩後亦言七姬相繼請自經並不言潘之逼迫又曰高因近事雖書之而不及其貞烈此真得季迪心事者升菴之論自矜矧獲不特誣七姬亦且誣季迪矣或以楊廉夫金盤美人詩言元紹酗酒嗜殺升菴或因是疑之然石崇斬行酒美人酷暴幾無人理其後綠珠卒効死金谷豈亦崇驅迫之耶矧隆平紀事載土誠女隆安公主於城破時自剄於盤門薪橋吳民憐之且見元紹爲厲因立廟麗娃鄉祀爲土神稱駙馬

府廟中僅塑公主象言張不言潘者以明初魏觀事懼塑元紹象干禁也一門節烈互相輝映劉夫人齊雲一炬流芬千古人不以張氏不終而薄之又豈可以元紹不終而輾轉輕議七姬哉尤可怪者顧云美諸人妄拾文衡山餘論以張來儀宋仲溫盧公武爲七姬撰文書篆稱爲仲昭殘客不知淮張當日開賓賢館以致天下豪傑故海內文章技能之士如陳基張憲輩悉仕於吳之三子者果令臣於淮張亦如韋莊之於蜀羅隱之於吳越而已然考明史宋克傳曰張士誠欲羅致之不就宋公如此則張盧二公可知又明祖平吳凡張氏客如楊孟載輩皆謫徙臨濠獨

三人不與則三人既非張氏客其不爲潘氏客更可知已況衡山跋中亦曰賓賢盛時三公與楊廉夫高季迪俱號高邁不爲所屈由此觀之衡山當日自以會拒寧藩之聘書此以寄懷抱詎可以俛首執筆四字卽用爲羅織經耶又考吳寬平吳錄最爲直筆淮張遺事尤不少假借獨於七姬死事則大書曰張來儀爲志以表其烈假令當日果有漁聚雉經之事則錄中於元紹豈無貶辭而來儀亦必早騰諛墓之謗又何表烈之足稱哉至云美以三公久處圍城不去爲非不知仲溫公武皆蘇產來儀亦久寓於吳且其時與淮張逐鹿走者越則有方國珍閩則有陳友定

楚則有陳友諒廣則有何真蜀則有明玉珍金陵則有明祖滄海橫流去將安適但令不爲所挽卽處危地亦何害耶或又引王元美稱升菴跋語爲漢廷老吏以實楊識之不謬然元美亦嘗謂升菴工於證經而疏於解經詳於稗史而略於正史詳於時事而不得詩旨求之宇宙之外而失之耳目之前此真元美持平之論而升菴所言多違公是亦於此可見矣吳中貝寶嚴居士淵雅嗜古搜得此志原本重付鈎搨陸明經準博采舊聞思以定此事是非惜世多震於楊說卒無有相與論定者夫淮張以天日不照不幸而國亡身僇元紹出處材智初何減於梅殷李堅輩

徒以時勢遷革而禮賢下士之美亦多湮諱不傳至七姬以弱女子同時舍生取義自可與日月爭光又得張宋諸公詞翰以表彰之蓋棺論定而後似可無異詞矣乃不幸遭滄桑之變於生前更不幸覲雌黃之口於身後文人輕薄實可寒心信如所言此志既非佳傳而居士與此片石共語又何足爲嘉話乎余爰取淮張已事論之淮張之是非既定則元紹之是非亦定而七姬之是非自更無不定此卽張來儀諸公當日表彰貞烈之微意也雖使升菴諸君復起不易吾言矣

汪端論曰來儀詩高雅不及青邱俊爽不及孟載而行第暢達而少頓挫未若近體清澹澹逸有不盡之味○澄懷居士七姬權厝志論一首于來儀諸公出處實能闡幽糾謬爰錄篇首亦知人論世之意也

月夜舟行入金山

在吳中

夙志羨山水塵縈久未遑名峰久在望茲辰一來翔揚舩入南渚夕氣倏蒼蒼紆直水無極沿澗路更長皓月懸高天廣川散飛霜夜寒人語清煙扉繞迴塘歸樵遞谷響驚鳥動林光愛此塵境遠敢畏露霑裳

楚江清遠圖

猿啼楚山晚雲生冒洲渚返照入澄江風吹半峰雨中有

遠行舟悠悠待徒侶。

金川門

兩山夾滄江。拍浮若無根。利石侔劒戟。風濤相吐吞。維天設巨險。爲今國東門。試將一卒守。堅若萬馬屯。我來犯清曉。天空霜露繁。列宿森在列。北斗峭可援。江光合海氣。溟滓神攸存。俯視不敢唾。中有蛟龍蟠。浮圖者誰子。高居凌風旛。下見渡口人。擾擾蜂蟻喧。愧彼超世士。去去將何言。題畫

山中送陳惟寅

春山有佳趣。累日同游寓。我爲採薪客。君先拂衣去。竹翠落閒堦。禽聲出高樹。空館愁獨歸。依然攜手處。

余將軍篆書搨本歌

卽忠襄公闕也

余將軍守舒州。舒州之城大如礪。長江西來繞城流。賊船如雲壓城破。將軍提劒城頭坐。劒未動。敵已奔。鯨鯢蔽江。江爲渾。孤軍六年。二百戰。王師不來。城自存。無兵猶足戰。無食安可支。豈無愛妾與愛馬。殺之不解。壯士饑力盡。矢竭將奚爲。倉皇辭舌罵不已。義士千人同日死。祇今還有盡忠池。碧血清冷化爲水。將軍持節東州時。作此篆書形。崛竒妙墨已隨神。物化好事當時臨得之。雖非其真意。獨在垂金屈玉蟠蛟螭。我拜重是忠臣跡。秦相雖古其入非。

鳴呼將軍此書配者誰請君摹取活溪石上中興碑。

畫雲山歌

我昔曾遊廬岳頂。欲上青天凌倒景。山中白雲如白衣。片片飛落春風影。雲晶晶兮花冥冥。萬壑盡送洪濤聲。恍然坐我滄海上。金銀樓觀空中明。上清真人笑迎客。夜然桂枝煖白石。手持鳳管叫雲開。虎咆龍吟山月白。明發邀我升東峰。導以絳節雙青童。天雞先鳴海出日。赤氣照耀金芙蓉。屏風九疊花茸茸。霧閣雲窗千萬重。胡不置我邱壑中。一朝垂翅投樊籠。空畱萬片雲。掛在清溪千丈之寒松。愁來弄翰北窗裏。貌得雲山偶相似。遂令殘夢逐秋風。一夜孤飛渡江水。夢亦不可到。圖亦不可傳。不如早賦歸來篇。仙之人兮待我還。安能齷齪塵土間。坐令白雲摧絕無所歸。青山笑我凋朱顏。程孟陽云跌宕超忽規模太白

送劉仲鼎歸杭州

欲別又牽衣。傷心故舊稀。自憐爲客久。不忍送君歸。遠岫明殘雪。空江淡落暉。東風重回首。一雁背人飛。

贈僧還日本

杖錫去隨緣。鄉山在日邊。遍參東土法。頓悟上乘禪。呪水龍歸鉢。飀經浪避船。本來無去住。相別與潛然。

寄王止仲高季迪

祇恨孤城未解圍。圍開番遣別相知。夕陽江上匆匆酒。細雨燈前草草詩。有夢直從花落後。無書空過雁來時。郭西

明三十家詩選二集卷二十一
古寺題名處今日重遊却共誰

重過蜀山徐幼文隱居

憐君舊隱此林間。一去神京未得還。獨客重來多白髮。故人不見只青山。岸前古樹曾維艇。雪後高齋幾扣關。何日能除簪紱繫。暮年相約共投閑。

金華道中送鄭邴文東歸

柳絮飛飛共語離。尊前會面定何時。交情冷淡孤衷在世。味辛酸。兩鬢知。春水亂灘船下疾。曉風殘月酒醒遲。湖邊鷗鷺休相笑。破篋無錢只有詩。三四真婉

揚州道中

馬頭津口足風波。歲晏遙乘一傳過。南渡客來多漢語。下

江船去半。吳歌蕪城總入新編戶。瓜步斜連古漕河。何處吹簫明月夜。野田茅屋曉煙多。

過西崦

白日都消筆硯間。偶因行藥到松關。秋聲不盡蕭蕭葉。夕景無多淡淡山。蛩響寒齋僧自定。苔荒深院客常閒。已知身世俱成幻。莫歎西風鬢易斑。

曉過淮陰

軍城鐵鎖曉開關。使節星馳未敢閑。淮水東流應到海。瓜洲北去少逢山。行人欲斷寒煙外。遠燒時明亂葦間。却憶帝京風物盛。禮成須及上春還。

送蓮社陸道師歸鏡湖別業

一錫橫飛下鏡湖。頭顱老去世緣疎。庭栽竹少堪容鶴。池種蓮多不礙魚。滿室香雲經盡後。半窗明月定回初。陶潛懶入東林社。是處青山可結廬。丁卯渭南之間

閩中春暮

吳山入夢驛程賒。身逐孤帆客海涯。九十日春多是雨。三千里路未還家。枕椰土潤蠻煙合。楊柳江深瘴霧遮。倚徧闌干正愁絕。杜鵑啼過木蘭花。

唐叔良溪居

高齋每到思無窮。門巷玲瓏野望通。片雨隔村猶夕照。疎林映水已秋風。藥囊詩卷閒行後。香篆燈光靜坐中。爲問祇今江海上。如君無事幾人同。

歲暮山居

寂寂閒居隱翠微。蕭蕭修竹護柴扉。葉聲亂響莓苔屐。雲氣時生薜荔衣。雪滿石牀門閉早。草侵碁局客來稀。歲寒正好看書卷。不用登高怨落暉。

山中

獨坐澗邊石。林空秋意長。夜深山月白。松露滴衣涼。

趙仲穆畫蘭

芳草碧萋萋。思君灑水西。盈盈葉上露。似欲向人啼。

聽老者理琵琶

老來絃索久相違。心事雖存指力微。莫更重彈白翎雀。如今座上北人稀。

贈琴士

有客夜半來山中。橫琴坐石彈松風。松風曲罷抱琴去。落月一聲天外鴻。

題陶靖節像

五兒長大翟卿賢。彭澤歸來只醉眠。籬下黃花門外柳。風光不似義熙前。含思凄惋

寄天目山雍長老

天目之山青岵岵。道人縛屋青山椒。白雲出山不歸去。春風吹老黃精苗。

燕山春暮

金水橋邊蜀鳥啼。玉泉山下柳花飛。江南江北三千里。秋

絕春歸客未歸。宋轅文云。中晚佳境。

取勝亭感舊

細雨微消紫陌塵。湖光冷落似無春。朱門記得曾游地。楊柳青青不見人。

徐賁十四首

賁字幼文其先蜀人由毘陵徙居吳家城北齊門外。工詩善畫山水元末為淮張客未幾避去之吳興隱居蜀山吳平謫徙臨濠尋放還洪武七年被薦至京。九年遣廉訪晉冀及還檢其橐惟紀行詩數首太祖悅授給事中改監察御史巡按廣東又改刑部主事。遷廣西參政以政績卓異擢河南左布政使大軍征

洮岷道其境坐犒勞不時下獄死有北郭集六卷亦張習所編刻

王元美曰方伯體裁精密情喻幽深頗似錢郎

朱錫鬯曰呂志學題幼文所畫山水圖謂肆筆迺麗清潤而帶書法於詩亦然才氣方之高楊張三君稍為未逮然詩法砉然森有紀律長篇險韻極其熨帖

頗有類皮陸者又曰張來儀先從吳移居戴山一云青山

以詩招幼文云吳興好山水子我盍遷居繞郭羣峰

列迴波一鏡如蠶餘卽宜稼樵罷亦堪漁結屋雲林

下殘年共讀書幼文乃移居蜀山兩山蓋相望也

汪端論曰幼文氣格近弱在四傑中為最下然才調

嫻雅絕無俗韻如王謝子弟雖復不端正者亦奕奕有一種風氣若菜邁諸詩以鋪敘騁長不足取也

吳越兩山亭

長江接海門。一水限吳越。兩山鬱相對。峰巒各羅列。勁勢爭吐吞。蒸嵐互出沒。尹君好游觀。結亭山水窟。闌干出層巔。細路縈百折。崩石絡垂蘿。老樹著棲鶻。平生登臨興。盡為山水發。不知嘗膽人。此地幾征伐。至今兩山雲。來往似奔突。嗟余客江海。所歷多奇絕。何當上斯亭。長歌弔遺烈。

過荷葉浦

粼粼水溶春。淡淡煙銷午。不見唱歌人。空來荷葉浦。無處寄相思。停舟采芳杜。朱笈亭云結二句倒出之味便長

中秋飲王擴相川別業

風高海雲收。月出天宇空。今日寒暑均。適與諸君共。懽深坐忘永。契合飲更痛。露螢寒不飛。水鳥夜停哢。山精各潛匿。銀蟾忽飛動。亭亭廣寒桂。不知何年種。我欲問嫦娥。素鸞無由控。佳節屢變更。壯心久恹恹。人生非仙骨。有樂當自縱。惜無桓伊笛。爲爾作三弄。

晉冀紀行錄一

前登盤子城。山隘勢欲逼。路迴土峭絕。傍夾千仞壁。石狀如矩斲。巨細總方直。無泉土脈死。草木盡改色。高巔有保障。重門閉重棘。陰慘行人險。惡意叵易測。信知狐鼠輩。得在此中匿。我生好壯觀。努力更攀陟。立久日將晡。浮雲渺

鄉國

柳短短送陳舜道

柳短短。春江滿。蘭渚雪融香。東風釀春暖。山長水更遙。浩蕩木蘭橈。蘭橈向何處。送君南昌去。離愁落日煙中樹。

送曾伯滋赴西河將幕

上將初分閫。儒官解習兵。風旗春獵野。雪帳夜歸營。洮水從岷下。祁山入隴平。知公能載筆。艸檄報邊聲。

送朱知事

惆悵官亭酒。如何送客頻。水煙漁市晚。花氣野橋春。小騎行沙健。輕衫映柳新。尊前莫催別。明日異鄉人。

兵後過臯亭山

阜亭西去遠。一過一悽然。雁宿蘆中月。人歸草際煙。漁家多近水。戎壘半侵田。尚喜餘民在。停舟問昔年。

送潘士謙歸廬州省親

微名雖不偶。且得奉慈親。為客逢多難。還鄉有幾人。鳧鷖江郭雨。桑棗楚郊春。此去尋問里。俱非舊識鄰。沉痛

次高季迪畱別韻

柴門村徑帶溪橋。來往因君豈憚遙。淺水不波仍漾漾。疎林無雨自蕭蕭。檣留夕照人將別。江作新寒酒易消。明日秋風重悵望。還將離思託歸潮。似季迪第二等詩

送張山人還天平

幾欲求田負舊盟。羨君西崦草堂成。每緣種橘多開地。獨為修琴始到城。黃葉已先霜降落。白雲長在雨餘生。龍門林屋無多遠。此去尋幽莫計程。

送呂庸南

雪色上征衣。雲沙雁欲飛。去家千萬里。只解送人歸。

青青水中蒲

青青水中蒲。織作團團扇。不肯贈傍人。自掩春風面。

送沈德虔

江聲千里萬里客。路長亭短亭。後夜相思何處蘆。花明月沙汀。

胡奎七首

奎字虛白海寧人。元末嘗游貢師泰之門。又與高季

迪友善明初以儒學薦官寧王府教授有斗南老人詩集六卷

朱錫鬯曰虛白泊舟鄱陽望湖亭見石刻東坡黑雲翻墨未遮山絕句次韻和之書於壁間俄見一叟來誦其詩曰子非斗南老人耶乃為長揖回顧不知所之因以斗南老人自號高青邱贈詩所云簸弄明月琵琶洲者是已

汪端論曰虛白詩神韻清澈有金膏水碧之致竹垞謂其格調太熟若古人集中已有者貶之未免太過

秋夕

凡此萬井秋商聲在高樹風條絡緯鳴露葉流螢度天河

一杯水流向西南去坐念素心人佳期渺何處

夢游廬山

我有紫霞想夢游匡廬峰仙人凌絕頂手弄金芙蓉芙蓉亭亭九天上壘嶂崩騰涌波浪五色雲中白鹿鳴三更海底金雞唱懸崖瀑布從天來疋練倒界青天開高人自是陸修靜邀我石磴行莓苔九江秀色可攬結欲跨長鯨捉明月望斷蓬萊青鳥書琪花落盡無人折飛身上挹香爐煙坐臥九疊屏風前翻然拜手招五老一笑彷彿三千年松風冷冷吹夢覺鶴背高寒露華落早知此境隔塵凡只合栖神向邱壑何人寫此江上山雲山與我心俱閑明當會碾鸞輪去長謝時人竟不還

送徐千戶之甘州

春寒初試越羅袍。不惜千金買寶刀。馬援橐中無薏苡。張騫槎上有葡萄。崑崙西去黃河遠。函谷東來紫氣高。何事相逢又相別。隴雲邊月夜勞勞。李滄溟輩有此高調無此流暢

吳江竹枝詞

青裙女兒雙髻螺。唱出吳宮子夜歌。酒醒月明眠不得。秋風吹起太湖波。清脆是竹枝體

望湖亭次東坡韻

鷗外清波雁外山。望湖亭下繫歸船。夜深起坐占風信。人在珠宮月在天。

挽張光弼

二仙坊裏張員外。頭白相逢只論詩。今日過門人不見。小樓春雨燕歸遲。

蘆雁圖

草草書空不作行。相呼相喚過衡陽。蘆花月冷應無夢。啄盡寒沙一夜霜。四句分詠飛鳴宿食而渾成無跡由其筆妙

王蒙 七首

蒙字叔明吳興人趙子昂外孫也工畫山水人物爲文不尚矩度頃刻數千言元末官理問遇亂隱居黃鶴山自號黃鶴山樵洪武初薦授泰安知州後太祖大治胡黨或告叔明嘗於惟庸第飲茶看畫被逮論死卒於獄陶九成爲詩悼之。澄懷居士按世傳叔明以宮詞得妻不知乃王

旬事故
不載

朱錫鬯曰倪元鎮詩畫最自矜重不輕許人獨題叔明畫云筆精墨妙王右軍澄懷臥游宗少文叔明絕力能扛鼎五百年來無此君其誠服若此高青邱云叔明爲趙文敏外孫而其畫法自立門戶別具一種姿態與文敏無一筆相似其筆格不下文敏宜矣蓋文敏書畫詩皆尚工緻而叔明意在活脫所寫溪山林木或有柯無葉畫家謂之不了樹惟詩亦然往往不費推敲而有自然之致乃知善得師者不在循行矩步也

暮宿田家作

澄懷居士曰此詩或作藍靜之誤

木落天正寒山空日將暮荒林倦鳥歸亂水行人渡窮年
滯草莽短褐被霜露晚宿依田家主人情亦故汲水泉滿
澗燒竹煙在戶鐘殘溪上村月照階前樹濁酒初潑醅嘉
蔬亦時具且慰飢渴懷況諳村野趣老翁八十餘有子沒
征戍秔稻歲莫收官司日加賦我願息兵戈海宇重農務
愧乏經濟才徒然守章句

題畫

虎鬪龍爭萬事休五湖明月一扁舟綠蓑衣上雪颼颼雪
月光中垂釣鈎釣得鱸魚春酒熟一縷青煙燃楚竹蓬窗
曉對洞庭山七十二峰青似玉

重過玉山主人書畫舫

亂後重登舊草堂。主人延客晚樽涼。風搖竹影共籤亂。花
落池波硯水香。離別頓驚年歲改。夢魂愁殺路途長。欲知
阮籍何由哭。四海兵戈兩鬢霜。流轉警動

閨適

綠楊毵繫五湖舟。袖拂東風上小樓。晴樹遠浮青嶂出。春
江曉帶白雲流。古今我愛陶元亮。鄉里人稱馬少游。不負
平生一杯酒。相逢花下醉時休。明秀

客中感懷

十年踪跡厭紅塵。功業無成白髮新。夢裏不知家在遠。覺
來惟有影隨身。夕陽衰艸梁園暮。細雨閑花蕩水春。馬足
經行今幾度。溪山應笑未歸人。

過蘇州

山圍平野綠煙中。江葦蕭蕭兩岸風。誰種闐闐城外柳。年
年飛絮入吳宮。以風度勝

陳惟允荆溪圖

太湖西畔樹離離。故國溪山入夢思。遼鶴未歸人世換。歲
時誰祭斬蛟祠。

明三十家詩選二集卷二下

錢塘 汪端 允莊輯

袁 凱 三十三首

凱字景文華亭人父介元末為府掾能詩景文洪武三年舉於鄉尋薦授御史時諸武臣恃功驕恣得罪者漸眾景文疏言諸將習兵事恐未悉君臣禮請於都督府延通經學古之士令諸武臣赴都堂聽講庶得保族全身之道帝嘉納之敕臺省延名士直午門為諸將說書後帝嘗欲戮一人太子請釋之帝召景文問曰朕與太子孰是景文頓首曰陛下法之正東宮心之慈帝怒以為持兩端下之獄景文三日不食

帝遣人勸之食已而宥之每臨朝輒指之曰是持兩
端者景文一日趨朝詭得風疾仆不起帝曰凱風疾
當不仁命以木鑽鑽之忍死不爲動得放歸田里居
家以鐵索鎖項自毀形骸帝每念之遣使者卽其家
起爲本郡儒學教授景文瞠目視使者歌月兒高一
曲使者還奏帝遂置之永樂初卒景文負權譎有才
辨雅善談諧卒以自免於禍晚年自號海叟嘗背戴
烏巾倒騎黑牛游行九峰間好事者至繪爲圖其詩
舊有祥澤張氏刻乃景文自定歲久散佚天順中朱
應祥張璞所校選者名在野集多以已意更竄字句
皆未善正德間陸深得舊刻殘本與李獻吉何仲默

更相刪定刊爲五岳集旣晦集 國朝康熙末上海

曹炳曾合諸本正其謬誤重刻之名海叟集凡四卷
陸子淵曰元至正末楊廉夫嘗與客共賦白燕詩琴
川時大本有珠簾十二中間捲玉剪一雙高下飛之
句楊極稱之時景文在座意若不滿因賦一首楊大
驚賞手書數紙盡散座客由是有盛名人呼爲袁白
燕

俞汝成曰讀海叟詩知爲先幾恬澹之士

蔣仲舒曰景文詩如兒鷹試風雖未長成已自縱快
程孟陽曰海叟氣骨高妙絕去雕飾天容道貌卽之
泠然

宋轅文曰景文詩秀不及季迪健不及伯溫而體格莊雅時見逸思故獨爲仲默所推許

朱錫鬯曰王常宗斥楊鐵崖爲文妖惟詩亦然雖才情橫逸而習氣太深沿其派者高則溫岐李賀下或雜以宋詞元曲獨海叟純以清空之調行之洵不易得然合諸體觀之則不及伯溫季迪尚遠何仲默推爲明初詩人之冠非篤論也又曰海叟居松江府治東門外崇禎末單狷菴恂卽其址構白燕菴李舍人待問書聯於柱云春風燕子依然入大海鰻魚不可尋相傳孝陵有言東海走却大鰻魚何處尋得爲海叟而發也

汪端論曰海叟五古具體漢魏殊乏警策七古法少陵摹寫亂離一往易盡無縱橫開合之筆近體則更頽唐衰颯會不足當少陵下駟如此學杜恐不免村夫子之誚仲默喜其持論與已相符且利其才弱易制遂欲躋諸文成青邱之上此如虞山之譽松圓重敵以自重也松江何元朗輩齊人知有管晏復相與附和其說數百年間黑白混淆無復公論噫可慨已然海叟天才本自秀潔短古及律詩佳者和平典雅中時出俊語頗類大歷十子絕句不着議論餘韻悠然有朱絃疏越之致其詩品位置於貝張孫林間亦無媿色特崇之者太過無以服人茲選斥其所短而

錄其所長不敢如漁洋之於西涯竹垞之於滄溟因
譽者過當遂毛舉其疵以爲一無可取致乖忠厚之
旨且貽詩家門戶之禍於無窮也

楊白花

楊白花飛入深宮裏宛轉簾櫳間誰能復禁爾胡爲高飛
渡江水江水在天涯楊花去不歸安得楊花作楊樹種向
深宮飛不去陳臥子云感慨深長

遊子吟

遊子行萬里母心如之陸行有虎豹水行有蛟螭盜賊
陵寡弱風露乘寒饑誰云高堂安中有萬險危寄言里中
子親在勿遠離澄懷云字字從至性
流出足以嗣響東野

書北山精舍壁

夙昔慕幽曠中年值奔走及茲始知返顧已成皓首茲爲
山水選風氣固深厚崒嶽皆巘嶸綿邈盡林藪清泉瀉幽
磴白雲被層阜既多緇素流況有耕釣叟初心已云協雅
言得兼受始來疎梅墮復此山櫻剖庶幾去日遲誰謂行
當久揮手謝朋侶吾將寄衰朽陳臥子云清整之
作其源出於王粲

淮安道中

花明野館靜樹暗流鶯語行雲千里來凌亂傷心緒傷心
復何事家在江南渚日暮莫回頭脈脈天涯雨

池上

秋池行樂去池樹色已暝露下夕衣涼月上風簾靜飢禽

墮疎竹。鳴蛩出深井。夜久人事息。蕭然諸念屏。

古意 此詩海叟自喻也

文皇好直言。容受無畱停。鄭公在當時。頗得諫諍名。一稱田舍翁。千載傷我情。嬰鱗固爲難。回天亦非輕。先人有薄田。歸與長沮耕。

送李高士歸荊州

南京高宴罷。西土遂言歸。江路猶殘雨。荆門正落暉。蓬生仲蔚宅。秋入老萊衣。明日思君處。蕭條鴻雁飛。

馬氏西園宴別吳進士善卿

竹陰連水屋。荷氣集池臺。南國佳人去。西園高宴開。好風因樹起。新月渡河來。別後江潭上。離腸日九迴。

客中除夜

今夕爲何夕。他鄉說故鄉。看人兒女大。爲客歲年長。戎馬無休歇。關山正渺茫。一杯柏葉酒。未敵淚千行。三四日真至

思歸兼簡嚴八

天高風正急。鴻雁傍人飛。江外無來使。淮南盡擣衣。悲歌聊當泣。遠道亦同歸。爲報嚴夫子。滄洲與願違。

懷王道士

宣城王道士。愛著芰荷衣。自清江別三年。白雁飛酒徒。隨處有沽客。向來稀。最憶青城夜。狂歌不肯歸。

送任李二高士歸越

老。去。任。公。子。重。來。李。少。君。仙。凡。初。不。遠。江。海。自。離。羣。水。遶。

吳宮樹山連禹穴雲汀洲有長笛日暮不堪聞

遠客

野客頻經雨深林獨閉門故人俱落魄稚子共朝昏城郭無歸路江湖有斷魂夜寒燈燄短嗚咽對殘尊

春園

春園江上水江霧日昏昏沙暖常垂釣花深不閉門家童鋤隴麥野客共盤飧衰老仍耽酒經年懶出村

邨居懷京下一二友生

罷職非能吏歸田卽老農有詩聊度日無字可書空白髮將誰念黃梁且自春故人能問信家在五湖東

此詩用洪武正韻

出三江口有懷錢野人袁

處處無歸路悠悠且逝波渚花風外少江樹雨中多吹笛蛟龍聽開窗鶴過高人著書手頭白共蹉跎

聞笛

花發吳淞江上邨隔花吹笛正黃昏風塵遠道歸何日燈火高樓合斷魂夜靜幾家無別淚雨聲終日過閒門天邊楊柳今無數短葉長條非故園

廡齋

艸閣閒亭春水邊雨蒲風柳自紛然鄰翁對客還爭席水鳥依人欲上船西北朝廷無使節東南城郭有烽煙老夫避地非游說正少蘇家二頃田

登虎溪閣

秋深時節雨霏霏。獨坐江樓看雁飛。煙火數家山郭晚。帆檣幾處野航歸。謀生計盡人皆笑。投老鄉關事已非。聞道淮南新易將。江湖此日欲沾衣。得杜陵之貌

白燕和楊鐵崖先生韻

故國飄零事已非。舊時王謝見應稀。月明湘水初無影。雪滿梁園尚未歸。柳絮池塘香入夢。梨花庭院冷侵衣。趙家姊妹多相忌。莫向昭陽殿裏飛。澄懷云中二聯刻畫工麗起結亦有奇託自勝大本原唱空同謂此詩最下最傳非也

寄田官馬錄判

馬卿離別又三秋。行李蕭條古薊州。秔稻熟時多有賜。蒲萄醉後欲無愁。春風白雁雲邊去。落日黃河天際流。囊裏

新詩三百首。還能遠寄海東頭。

京師得家書

江水三千里。家書十五行。行行無別語。只道早還鄉。沈確士云

新月

既從碧雲上。復傍綺窗移。願得長如此。教人學畫眉。

題吳宮衰柳圖

遠岸依依落日明。吳王醉處少人行。多情獨有垂楊樹。猶送深宮夜雨聲。

淮東逢張十二信

少年追逐共西東。吳邁文章馬亮弓。一自干戈零落盡。白

頭。淮。海。獨。相。逢。

程孟陽云似乎率易然是老杜法
脈李舒章云似子美存沒口號

揚州逢李十二衍

與子相逢俱少年。東吳城郭酒如川。如今白髮知多少。風雨揚州共被眠。

寄三江王六秀才

滄洲荷屋晚秋時。橘柚青黃滿戶垂。安得扁舟趁潮去。醉看江雨散輕絲。

重過黃渡有感

馬家宅畔無喬木。徐氏門前芳草多。畱得白頭漁父在。年年長笛送滄波。

石頭城晚望

落日依依下石頭。亂雲東望是蘇州。人間何似歸心切。獨有春江不斷流。

淮西夜坐

蕭蕭風雨滿關河。酒盡西樓聽雁過。莫怪行人頭白盡。異鄉秋色不勝多。
吳明卿云
悲惋欲涕

李陵泣別圖

上林木落雁南飛。萬里蕭條使節歸。猶有交情兩行淚。西風吹上漢臣衣。
李時遠云
鎔詞鑄意妙絕無比
沈確
士云詞婉意嚴漢臣二字春秋之筆

過潯陽

夜泊潯陽江上沙。扁舟何處載琵琶。西風不管水流去。依舊滿汀開荻花。

明三才詩選二集卷二下
諸故人攜酒蘇臺餞別醉歸海上賦寄

吳王洲上百花開。花下人人勸酒杯。醉臥春江三百里。不知月過海門來。

附錄

管

訥十四首

訥字時敏華亭人九歲能詩及長師楊廉夫友袁景文洪武九年徵拜楚王府紀善之國後升左長史事王二十五年乞致仕歸王請命於朝畱居本國祿之終身歿葬黃屯山初從楚昭王破銅鼓蠻諸將欲殄其餘黨時敏固爭之得免王曰管長史一言活數萬人必有後已而生子名延枝王育之宮中長爲府紀

善亦能詩時敏所著有蚓竅集十卷丁孝子鶴年爲序而評之又有秋香百詠還鄉紀行等集

丁鶴年曰時敏詩氣象雄渾襟懷曠達用事親切措辭醇雅黃文獻公謂文章莫難於詩詩莫難於近體時敏體制嚴整間出新語亦復清俊非所云難者與朱錫鬯曰時敏詩春容疏越豈出景文之下而說詩家入選寥寥臥子舒章生長五茸知有袁而不知有管竟置不錄徑寸之珠詎可遺哉

汪端論曰時敏詩緒密思深剗除纖弱雖近晚唐在雲間詩人中亦海叟羽翼也
和陸伴讀闔過梅根

江行愜素懷。遐覽匪遊冶。開蓬望九華。隱隱白雲下。素波明遠川。青天入平野。煙樹澹欲無。風泉斷還瀉。因知漢陂舟。差勝習池馬。斯游樂未央。我輩胡爲者。

曉起

空館曉晴初。官清遠塵俗。怡然對簡編。庶矣忘榮辱。遙峰擁歸雲。高城澹微旭。落盡冬青花。江南雨新足。

從征古州蠻迴塗紀驛

怡溶

王程不敢緩。四日下辰陽。古木將軍廟。春波使者航。城依山勢險。江納雨聲長。莫上觀瀾閣。傷心在異鄉。

石頭口

曹公兵敗處。今識在嘉魚。赤壁三分後。烏林百戰餘。橋浮春渡澗。舟泊夜江虛。千古英雄事。悲涼太史書。

魚山

桃花江上驛。春水賣新魚。滿尺銀堪比。千鱗錦不如。因歌悲客裏。每食感王餘。江海親朋少。誰傳一紙書。三詩寫景使事寓感皆臻其妙

銅爵妓

銅爵高臺上。西陵遠樹邊。君恩徒自重。妾貌竟誰憐。羞掩歌時扇。愁登舞後筵。惟餘漳浦月。三五夜空圓。溫厚不讓謝元暉作

送瀘州判官

新除貳守向瀘川。西上長江萬里船。行李莫辭爲客遠。判

花政喜得君賢官。鹽歲汲千家。井火米時收。五月田緩帶。從容有佳興。寄詩細寫薛濤牋。

寒食

三月東風大放顛。今年爲客倍淒然。杏花時節偏聽雨。寒食人家不禁煙。千里故鄉愁共遠。一春白日夢相牽。天涯草色青青處。祇憶千山墓下田。

題王秉正雲林清隱

青林白谷水雲鄉。隱者深居一草堂。百道松泉當戶落。四時花雨入簾香。門前車馬紅塵遠。座上琴書白日長。滿目故家風景在。不須重畫輞川莊。

題董時貢所藏山水

公館多清暇。林泉愜所探。人家如谷口。風景似江南。斷逕荒深蘚。崩厓老巨楠。鯨波通海去。鳥道與雲參。江艇維晨渚。巖扉掩暮嵐。雨田收赤黍。霜圃摘黃柑。未築清風屋。先尋白石菴。醉來休荷鍤。老去願投簪。許我閒身在。從渠俗慮耽。偶然忘世累。聊謝望雲慙。

贈別

草色青青漢水新。異鄉聽雨怕逢春。客懷最是今年惡。頻向東風送故人。

題畫

柴門春盡動鷗波。樹色山光雨後多。老去無官長自在。醉眠江閣聽漁歌。

羣峰競秀繞儂家。流水當門石徑斜。閉戶不知春已去。白雲滿地落松花。

卽事

小宴初闌罷玉笙。東風庭院好春情。流鶯啼過樓東去。一樹梨花正晚晴。朱笠亭云妙在不盡

鳳州陽春志云東風掃雪雲
春白不春猶未水荷融志
出氣氣奔暮嵐雨田郊表
飛彩龍嶺沮去日漸融如
公論送歸期林泉別則人

